


UTL AT DOWNSVIEW



D RANGE BAY SHLF POS ITEM C
39 10 13 06 16 003 8

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

BJ
1639
A5

Ahmet Mithat
Ānā, bābā

۱۱۱
برای
فرمان



— آنا، بابا —

نک

اولاد اوزرنده کی حقوق و وظائفی

Ahmet Mithat, 1844-1912

محرری: Anā, Bābā

احمد مدحت


{ ترجمان حقیقت } غزته سنه تفرقه ایدلد کدن

صکره معارف نظارت جلیله سنک رخصتیه

ایلك دفعه اوله رق کتاب شـکلنده

دخی باصله مشدر .

استانبول : ۱۳۱۷



1015453

BJ

1639

AS

V171

(آنا، بابا)

آنا بابا اولادك وسیلهٔ تولیدیدر لر. بویك
بللی برشیدر. قانون طبیعتك بر از کیزلیجه
اولان احکامی دوش-ونیله جك اولورسه
کوریلورکه اولادك اصل مولدی بابادر. بابا
اولادی مشیمهٔ مادره تولید ایدرده آندن
صوکره آنی اوراده آناسی تربیه و اتمام ایلر.
اولادك ایلك وسیلهٔ تولدی اولدینی ایچوندرکه
بابانك اولاداوزرنده برچوق حققری واردر.
ملل قدیمه نزدنده بو حق شم دیکی درجه سندن
زیاده ایدی. پدرلر ایسترلر ایسه چو جقلرینی

کوله وجاریه اولق اوزره بشقه لرینه صاته
 بیلورلرایدی . حتی بریدر اولادینی اولدورسه
 بیله بوفعل کریمندن طولایی هیچ بر جزا
 چکمز ایدی . بالنسبه یقین زمانلرده یعنی انوار
 اسلامیت تنویر عیون ایتزدن اولجه عرب
 جاهله نزدنده مولوداتی بسیلایه مامک حساب
 وخوفیله اولدورمک وهله قزلی بتون بتون
 لزومسن صایه رق ازاله ایتمک عادت کریمسی
 وار ایدی . بو عادتک وار لغندن ط-ولاییدر که
 قرآن کریمده هر کسک رزقنه حق تعالی
 حضر تلرینک کفیل اولدینی نظر حکمتیه
 قونیله رق اتلاف اولاد عادت کریمسی منع
 ایدلدی . جهات سائر جه دخی مدنیت ترقی
 ایتدکجه بابالر بویله بر ط-اقم حقوق مفرطه دن
 محروم ایدلایلر . اولادینی اولدورمک صاتمق

دكل آبالا لزوم خربالا مقدر بيله منع اولنديلر .
اطفالك شـدداند پدره قارشودنخی حمـایه سی
ایچون حکومتـلره برحق ولایت ویرلدی .
انسانیت و مدنیت شانی دخی بونی اقتضایلر
ایدی . بونـکله برابر اولاد اوزرنده بابالرك
ینه برچوق حقـلری واردر . عجبـا بو حقـلری
یالـکـز چو جـقـلـرك وسـیـله تولیدی اولدقلرنـدی
نشأت ایدر ؟

بابالـر چو جـقـلـری یالـکـز تولید ایتـرـلـری
ایچون آنلر اوزرنده برچوق حقوقـه مستحق
اولیورلر ایسه بو حقوقـك حقوق حیوانیه دن
اوله جفی حسیبله حیوانات سائره عالمـجه دخی
بابالرك یاورولر اوزرنده بوکی حقـلری توهم
ایدلـك لازم کلور ایدی . بر آیغر دخی کنج
طایلری تولیدایتمـه یورمی ؟ بر بوغادخی بوزا -

غیرلرک، بر قوج دخی قوزیلرک وسیله تولدی
دکلیدرلر؟ هر نوع حیوانده ارککلر یا ورولرک
وسیله تولدی اولورلر اما عالم حیوانیتده
یا ورولر اوزرنده ارککلرک حقوق ابوتی
توهم بیللر ایدلر .

قدیمآ پدرلرک اولاد اوزرنده تا آنلری
اولدورمکه قدر واران حقوق وحشیانه سنی
بحق منع و احسا ایتمش اولان شرایع دینی
وقوانین مدنییه شمدیکی احوال متمددانه منزله
دخی پدرلر اولاد اوزرنده برچوق حقلر
ابقا ایتمش ایسه بو حال هیچ شبهه ایتما ملیدر که
پدرلرک اولاد حقنده کی وظیفه لرندن نشأت
ایتشددر . حیوانات سائرده پدرلرک یا ورولر
اوزرنده هیچ بروظیفه لری یوقدر . اک
چوقلری یا ورولرینک آنادن طوغدقلرینه

واقف بيله اولمازلىرى. بووقوف حاصل اوله جق
 اولورسه اوده ديشيلرك ياورولرينه باقق
 مجبوريت حيوانيهم سندن طولاي ارککه ميل
 واقبال کوسترمامه سندن نشأت ايدرکه بويله
 بروقوق اوزرينه ارکک دخى ا کثريا ياوره
 يلرى تلف ايتمه يورور. تا که ديشيلرانلر
 حقنده کى وظيفه مادرانه لرندن قورتولسونلرده
 ينه ارککه ميل کوسه ترسونلر ديه ! بو حالده
 حيوانات سائر عالمده بابالرك اولاد اوزرنده
 برکونه حقلى دخى توهم ايديله منزه انسانيت
 عالنه کلانجه بابالرك اولاد حقنده برچه-وق
 وظيفه لرى بولنديغندن وحق ايله وظيفه
 هر نقطه نظرحه متقابل اولديغندن بابالق
 وظيفه لرينه مک مقابلى اولق اوزره پدرلره
 برده بابالق حقوقى تعيين ايدلمک بالطبع مسلماندر.

بابالرك چو جقلم اوزرنده كى حقوقى انلر
 حقنده كى وظيفه لرندن نشأت ايله ديكي او قدر
 باهر بر حقيقتدر كه بو حقه ك درجه سى ده او
 وظائفك درجه سيله متناسب اولمق لازم كله چكى
 بتون ملل متمدنه نژدنده تسليم اولمشدور .
 اولادى حقنده بابالق وظيفه سنى تماميله ايفا
 ايتميانلر « خير سر بابا » حكيميله محكوم ايديله رك
 خيرى بتون بتون منقطع اوله جق اولور ايسه
 ادما ايديله چكلى حقوقدن انلرى تجريد
 قدر آراى عموميه اتحاد ايلر . هله ايش
 خيره بدل اكر بالعكس شر واعتساف
 صورتى اله جق اولور سه شريعتلر قانونلر بو
 بابايى حق ولايتدن بالكليله اسقاط ايدرك
 جزالانديرولرده !

بابا ايله اولاد اره سنده كى نسبت بويله

اولدینی کی آنا ایله اولاد اره سنده کی نسبت
دخی بویله وحتی بوندن ده از یاده در. اوت بوندن
دها زیاده در. زیرا والد لر چو جق لر نی یالکز
تولیده وساطت ایله آنالق وظیفه سنی ایفا ایدوب
یتورمش اولمازلر. ذاتا والد لرک یالکز بواصر
تولیده وساطت لر ی بیله پدر لرک وساطت لرینه قیاس
قبول ایده مزیا! بر پدر احتمال که بر تولیده
وساطتدن خبردار بیله دکلدر. او وساطتی
حقیقه بروظیفه و خدمت نیتیه ایتمش اولما یوب
برحق و حظ صورتنده ایتمش اولدینی هر پدر
منصف نزدنده معترف اولمق لازم کلور.
والده ایسه امر تولیده ایده جکی وساطتک
مبادی سنده بابا حالنده بولنسه بیله آندن صکره
چو جنی طقوز آی مدت رحمنده بس بیله مک
کی بر خدمت مهمه وبر وظیفه مدد شه

مجبوری التئہ کیرمش اولورکه بابا بو خدمت
 ووظیفه دن بالکلیه مصوندر. بو حالدہ اولادی
 تولیددن صوکره دخی آنالق وظیفه سنی ایفا
 ایدوب بتورمش اولماز. برچوق زمانه قدر
 یاورولرکندی کندیلرینی اعاشه و محافظه دن
 بالطبع عاجز بولنه جقلری جهته کندی کند.
 یلرینه کفایت ایدم جک درجه یه وارنجه یه قدر
 آنلری حمایه و محافظه دخی والدیه عاٹددر.
 دقت بیورلملیدرکه آنالق وظیفه سنک بودر.
 جهلره قدر واران قسمی حیوانات عالمجه
 دخی بویله در. بو حالدہ باقلسه اولاد اوزرنده
 حقوق نقطه نظرندن والدلرک پدرلره تقدم
 وتفوق اولیق لازم کلمی ایدی. حیوانات
 عالمجه بودخی بر درجه یه قدر بویله در.
 یاورولره هانکی پدرک محصولدره دیه هان

هیچ صور نماز . حیوانات عالمندہ بابایی آرامق
 یالکز جنس آتله مخصوص اولوب بوندن
 بشقه حیواناتک بابالرینی آرامق همانده واقع
 دکلدر . لکن آنای آرامق بویله دکلدر . فلان
 بوزاغی ویاخود طانا نالانجه اینکک یاوروسی
 اولدینی کرکی کبی آرانور . قویون وکچی وتا
 قاز واوردک وطاووق کبی کوچوک حیواناته
 قدر مبادی تولدلرندہ یاورولر هانکی آنانک
 مولودی اولدقلری آرانور و بیلنور . تایاورولر
 کندی کندیلرینی اعاشهیه مقتدر اولدقدن
 صوکره آرتق والدہ لرینه دخی منسـو بیتلری
 کسیلور .

شو صورت طبیعیه سندن عبارت بولنان
 آنالق مبادی تولدده انسانلر نزدندہ دخی
 بویله در . همده نوع بشردن اولان آنالرک

مولودلرينه مقابل ايلك وظيفه لري مدتي حيوا-
 نات سائر ده اولان آفاق مدتي قدر قيصه ده
 دكلدر. يالكلز امزير مك مدتي بر، يا بر بچق،
 حتى ايكي سنه يه قدر دوام ايدر. آندن صكره
 دخي انسان يا ورولري ينه كندى كنديلرينه
 كفايت ايدمزلر. ده ابر چوق سنه لر بروالده نك
 حمايه سى التندر بولمغه محتاج درلر.

ايشته بونقطه نظر دن باقيه رق اولاد
 اوزر نده والده نك حقوقى پدره تقدم ايتمه سى
 لزومنه دائر يوقار وده ايراد اولنسان بر ايكي
 لاقر دينك قوت و اهميتى نظر مو ازنه ده آرتد قجه
 آرتار. اوت اولادك توليد و حمايه سى امر نده
 والديه دوشن وظيفه او قدر بيوك وزحمتى
 و حتى تهلكه ليدر كه حقوقك و طايفه متناسب
 اوله جنى قاعده عدالتنه قياساً والده نك حقوقى

پدردن پك چوق زیاده اولمق ضروریات بدیهه
 مرتبه سینه قدرده وارر • حقوق معنویه جهتی
 ینه بویله در • اما حقوق مادیه جهتی ینه بویله
 اولمق اوزره حکم اولنما مشدر • قادی نلر صاحبه
 البیت اولد قلمری حالده دخی احوال و حوایج
 مدنیه جه برنوع صباوت حالنده تلقی ایدیلر لک
 عمر لر ینک صوکنه قدر ارککلرک حمایه و اعا
 شه لر ینه محتاج اولملر یله بعدالنولد اولادک
 کندی کندیلر ینه کفایت ایده بیله جکلری
 چاغلره قدر والده لرک آنلری محافظه و اعاشه
 لری اصل پدرک اولاد حقنده کی وظیفه سنی
 ایفایه بروکالتدن عبارت صایلمشدر • آنک
 ایچون اولاد اوزرنده کی حقوق مدنیه نک
 کلیتی ینه پدره ارجاع اولنمشدر •
 اما تکرار ایدم که بوصورت صرف

مادیات نقطه نظر نندرد . جهت معنویه به کلانجه
والله لك حق وق معنویه سی پدرك حق وق
معنویه سندن البته دهها چوق زیاده در .
كرك اسكى و كرك یكى شرایع وق وانین دخی
بو حکمی بویه جه تحکیم ایتمشدر . هـ هـ
مدنیت و حکمت اسلامییه جه جنتك اقدامات
التنیده اولسی قادینلرك چوجقلىری یالکز
تولید ایتمه لرندن طولایى دكل اصل بونلری
کندی کندی لرینه کافی اوله جق چاغله
واردیر نجه یه قدر حمایه به بذل مقدور ایتمه لرینك
مکافات معنویه سیدر .

بورایه قدر مقدمه کلامزدن معلوم
اولدی که آنانك بابانك اولاد اوزرنده کی حقوق
معنویه و مادیه لری مجرد انلری تولید ایتمش
اوله لرندن نشأت ایتمکله قالمایوب بلکه اصل

تولیددن سوکره مکلف اولدقلری وظیفه لردن
نشأت ایله مشدر.

اوله ایسه آنانک بابانک اولاده مقابل
وظیفه لری نه کی شیردر ؟

او ! بونلر معلوم شیردر. اوله دکلکی ؟
معلومی اعلام دخی حاصلی تحصیل نوغندن
برسی عبث صایله ازمی ؟

عجله اتمیه لم . بونلر فی الحقیقه لزومی
درجه سنده معلوم شیر اولسه ایدی بومعلومک
احکامنه بحق رعایت کار بابالری و آنالری
پک چوق کورملی ایدک . مع التأسف اعترافه
مجبوریت واردرکه بابالق و آنالق وظیفه سنی
بحق ایفا ایدنلر من عادتاً نوادر دندرلر . بر از
صبر بیورلسون . سویله یه جکلر منی سویله یه .
لم ده قارئلر من میانده بو حقایق تکرار او کر نمکه

کنندیلرینی محتاج کور میانلر بو وقوفلری
یوزندن مسعودیت صحیحه لرینک تحقیق صو -
رئیه اولسون ینه مستفید اولورلر. فقط
اگر سوزلرمزه محتاج اولان بابالرو آنالر
بوسوزلردن عبرت آلوب شمدی به قدر اهمال
ایتدکاری او وظائف مقدسه یی ایفایه یکیدن
بسمله کش ایتدار اولورلر ایسه هم کندیلرینی
بواهمالدن طولایی عندالله وعندالناس مسؤ -
لیتدن قورتارمش اولورلر هم ده بزی شو
تبعات متاعبندن طولایی اومدیغمز قدر
مکافاتلندیرمش صاییلورلر.

* *

یوقاروده کی فقره مزك نه ایتلرنده آنا
وبابانك اولاده مقابل اولان وظیفه لرینی ذاتاً
معلوم اولان شیلردن عد ایتك خصوصنده

استعمال کو سترلاسنی رجائتمش ایدک . عالمده
 پک چوق شیر وارد رک بادی امرده انسان
 آنلری بیله - ورم ظنیه او کریمکه دخی لزوم
 کورمز . شو آنالق و بابالق وظائفی بولردن
 عدایده میز . عدایمکه جسارت بوله میز .
 قارئین عثمانیه به برازده شویولده خدمت قلمیه
 ایفاسی ایچون المزدده بولنان مأخذلری توسیعه
 لزوم کورده رک الک مشهورلرندن انتخاب طریقله
 سکز اون کتاب مبایعه ایتدک که ذاتاً کتبخانه من
 ده موجود اولانلرایله برابر مقدارلری یکرمی بی
 تجاوز ایلده دی . یالکیز فرانسر لسانیله یازلمش
 یکرمی کتاب ! یالکیز زمانمزک اولادینی تربیه
 و تعلیم یولنی کویتر یکرمی کتاب ! اوروپا
 ملل مترقیه سی کی اوج درت یوز سنه دنبری
 ترقیاته چالیشان خلقک تربیه اولاد خصو -

صنده حاصل ایدہ بیلدکاری اصول حاضرہ بی
 دخی کافی و تمام بولہ ما یوب اصول مذکورہ بی
 اتمام مقصدیلہ بر صورت منتقدانہ دہ یازلمش
 یکرمی کتاب! اما اویلہ یکرمی کتاب کہ قانت
 کہی داروین کہی اک بیوک متأخرین حکمانک
 اقوالنی دہ جامع! بویولده کی اسامی مشہورہ دن
 ایکی یوز قدرینی حاوی! ہلہ بونلرک بریسی
 « پداغوژی تاریخی » درکہ افلاط-وندن
 سپنسرہ کلنجہ یہ قدر ایکی بیک بشیوزسنہ دن
 بری بتون متمدن ملتہر تربیہ اطفال ایچون
 نہ کہی یولار دوشونمشلر، کشف ایتمشلر ایسہ
 جملہ-نی اجمال ایتمش قوجہ بر جلددر . بو حالہ
 قارشو!

— آنا بابا وظیفہ سیمی؟ آدم سن دہ

آنلری کیم بیلمز!

دبی ویرمکده بیوک احتیاط لازمدر .
 بواویله برشیدرکه « بیلورم » وهملرینه صیغه
 بیلیمک شویله طورسون اولور اولماز
 « اوکرنورم » عزمی بیله بوکا کافی دکلدر .
 بومبحث برانکیین دکزددر . آندن آله جغمز
 بعض قطرات اکر بر صبر استفاده جویانه ایله
 تتبع بیوریلور ایسه یک اومارزکه بوتتبعاتک
 ایچنده عقلاره حیرت ویره جک بعض تجارب
 دقیقه یه وقوف ایله هم مستفید هم متلذذ
 اولق یولی تأمین ایدلمش اوله جقدر . زیرا
 دها بورا جقدده خبر ویرمکه بویولده نشریاتمز
 یالکز شو مجله صغیره یه منحصر قالمایه جقدر .
 فلاطونندن زمانمزه قدر ایکی بیک بش یوز
 سندهن بری تکامل ایده کلن « پداغوزی »
 یعنی حضانت یعنی علم تربیه الاطفالک شو

« وظائف ابوين » مبحثه دائر ويرديكي
 تفصيلاتك خلاصة الخلاصة نه كوره پدر
 ووالدك اولاد حقنده كي وظائف ايكي نوعه
 منقسم اولور . برنجيسي وظائف ماديه
 وایکنجيسي وظائف معنويه در . وظائف ماديه
 اولادك جسمنه ووظائف معنويه روحنه عائد
 خدمتلى جامعدر . جسمه ايديله جك خدمت
 آنى امراض واسقامدن بالمحافظه حسن اعاشه
 وروحه عائد خدمت ايسه آنى ردائتدن
 بالمحافظه حسن تربيه دن عبارتدر . اما بوراده
 « وظيفة ماديه ، امراض واسقامدن محافظه ،
 حسن اعاشه » و « وظيفة معنويه ، ردائتدن
 وذاالتدن بالمحافظه ، حسن تربيه » ديه برقاچ
 كله ايله آدلرينى سويله ديكمز مباحث تحتنده
 نه قدر حقايق مندر جدر ! بوجهته طوضرى

انظار قارئنی برازجق اولسون استجلابه
موفق اوله بیلور ایسه ک حقیقه پک بیوک
سوینه جکیز .

وظائف مادیده و حتی وظائف معنویه ده
بیله بابالر اللرنندن کلدیکی قدر قصور ایتماکه
چالشورلر . بابا یوقدرکه اولادینسک محافظه
واعاشه سی امرنده آز چوق غیرتکار بولنسون .
هله هیچ بر آنا یوقدرکه بوغ-یرتدن بالکلیه
محروم اولسون . فقط کerk بابانک وکرك
آنانک ایفای وظیفه لری قدرت مالیه لریله
متناسب درظن اولنور . او یله دکلی ؟ فقیر اولان
بابا و آنا کندی اولادینه البسه فاخره کیدیروب
اطعمه نفیسه یدیره من آ ؟ ثروتنک کفایتنه
کوره کندیس ی نصل یر ایچر کینور قوشانور
ایسه اولادینی دخی اولنبتده اعاشه ایدر .

اما بعض پدرلر وارایمش که برحس خودکامانه
ایله عزت نفسلرینه مغلوب و محکوم اوله رق
کندیلمی لوقانطه لرده اطعمه نفیسه ایله
شکمپرورلك ایتدکاری حالد چوانی چوجنی
خانه سنده چارچور ایله چوپله نورلر ایمش .
بویله لری پدرکل انسان بیله صایله مایه جفندن
بوجهتی بمحه قاتمقدن استکراه ایله اکتفا ایدرز.
بمحمزه اولادنا ا کبادنا « یعنی » چوجقلمز
جکر پاره لر مزرده « احتساس پدرانه سنه تابع
اولانلر حقنده در . ایشته بو پدرلرک چوجقلمزنی
حمایه واعاشه لری قدرت مالیه لریله متناسبدر ظن
اولنور او یله دگلی ؟ حال بو که اول بول بو ظن
طوغری دکدر . قدرت مالیه اولسه اولسه
اکسا واعاشه امرنده سوس و ظرافت و نفاست
وبنا که ده سفاهت یولنده بر تاثیر کوسه تره بیلور .

لباس ديمك شداند هوائيه دن مدار تحفظ
اولديغنه و طعام ديمك صرفيات حيوانيه نك
وجودده پيدا ايتديكي نقصاني جبره وسيله
صايلديغنه نظراً يوقلقدن هلاك اولمايانلرك
كافه سي بو حوايجي لزومي درجه سنده تسويه
ايدوب مطوريورلر ديمكدور . لكن آنالرك
بابالرك اولاد حقنده كي وظائف مغنويه لري
قدرت ماليه لريله دكل كندى تربيه فكريه لريله
متناسباً ايضا اولنه جقدركه ايشته كوزاو كندن
اصلاً آيرلمايه جق اولان حقيقت دخى بو
حقيقتدور .

ثروت وسامانك اولادى ماده اعاشه
امرنده برفائده زانده سي اوله بيله جك ايسه
اودخى اولاد صاحبلىنك تربيه فكريه لريله
متناسب اولقى ضروريدر . بركل برچوق

زنکین بابالر کوردک که قیش موسمنده اولادینی
 کویا حسن اکسا ایچون چفته فانه لالره ،
 خرقه لره ، کورکاره ، قاپوطلره غرق
 ایدیورلر. یاتدقلری اوطه لرده یاقوتلی صوبالر
 ویاخود تپه له مه طولدیرلمش مانغاللرایله یکر-
 میدن یکر می بش درجه یه قدر حرارت
 حاصل ایتدکلری حالد چوجقلری فانه لالره
 ملبس اوله رق یاتاقلره یاتیروب اوزرلرینه
 چفته یورغان، بطانیه، فلانده اورتیورلر.
 ای بو حال چوجقلری حسن اکسا و حسن
 محافظه عد اولنه بیلورمی ؟ بویله آلشان
 چوجقلر هر نه زمان وجودلری اوزرنده
 یکر می یکر می بش درجه حرارت بوله مازلر
 ایسه اوشورلر. هله سکز اون درجه یه قدر
 اینن برصوغوق هواده مدهش خسته لیکلره

دوچار اولملری محققدرد. هم سکنز اون یاشنده
ایکن بویله محفاظه ایدیلن بر وجود الی
التمش یاشندن صوکره نصل محفاظه ایدملی ؟
محاملری بونلره مسکن می ایتلی ؟ كذلك
بردکل برچوق زنکین بابالر کوردک که یازمو -
سمارنده اولادینی حسن محفاظه غیرتیه
کونشه چیقارتمیورلر. ترله مسون دیه قوشدر -
میورلر. «قوراندور» خلیاسیله اسن روزکارلردن
اسیر که یورلر. بر طیبیه صورولسه محفاظه نک
یودرلوسنی اصلا بکنمز ایسه ده صورمغه ده تنزل
ایتمیورلر. چوجنی علی الدوام بویله محفوف -
ظیت حالنده بونلر یرمق قابل اولورمی ؟ براز
حرارتلیجه کونشده و براز روزکالیجه یرده
بونلر حقیقه خسته اولورلر. محفوفیتلرینه
نه قدر چالیشلور ایسه اونسبتده جانسز قانسز

قوتسز قاله رق متاعب طبيعیه و مجبوریه بشریه به
 تحمل ایچون دخی قابلیتسز بولورلر . کذلک
 بردکل برچوق زنکین بابالر کوردک که اولادمزی
 یسیله به جکزدیه وقتلی وقتسز ط-اتلیدن
 طوزلیدن چیکندن پشمشدن الارینه کچن شیلری
 چوجقلرک اغزلرینه طقیشدیره طقیشدیره
 بیچاره لری صیصقه ایدیورلر . دهامینی مینی
 یاشلرنده معدله لری اتساعه دوچار اوله رق قرنلری
 کوپ کبی شیشیور . بیونلری آرمود ص-ایی
 کبی اینجه لیور . دیشلری چورویوب دوکیلیور .
 ای اولادی حسن حمایه واعاشه به ثروت
 وسامانک فائده سی اولدیمی ؟ بویولده بیویانلر-
 دن قادین ارکک پک چوقلرینی طانیورز که
 عصبی غیر عصبی مراق و خلجان نوعندن
 برچوق خسته لیکله دوچار اوله رق بونلرک

اسبابی اولمق اوزره خاطرلرینه بیک شی کلدیکی
 حالده اتساع معده دن عبارت بولندیغی خیا-
 لارندن بیلکچمیور . « بیلکی » اولمادقدن
 صکره معیشت ماده خصوصنده زنکیندکک
 نفعندن زیاده ضررندن قورقولسه استبعاد اولما-
 مق ایجاب ایدر. برده اوته طرفده فقیرک چول
 چاپوت کیوب چور چ-وپ ایله بس-یله نه رک
 اولور اولماز شدائد هوائیه یی وظیفه بیلک
 ایدنمکسز بن هر در لو حرکات جسمانیه و ریاضت
 بدنیه ایله طوسونلر کبی بیویان چوجقلرنی
 کورنجه بونلرک بختیارلقلرنی زنکین چوجقلرک
 بختیارلقلرینه فائق بولمقده فکر و نظر اربابی تردد
 ایده منزلر .

سوز آره سننده « بیلکی اولمادقدن صکره »
 دیدک، طوسونلر کبی چوجق یتشدیرن فقیر

پدرلرایله نه جش بوجوش چوجقار يتشديرن
 زنکين پدرلر شو « بيلکي » نقطه نظرندن
 مقایسه ایدیله جک اولورلرایسه آره لرند بيوک
 برفرق کوریلور. اوزنکين پدرلر فقيرلره قیاساً
 پک چوق بيلکيچ اولق اوزره تلق اولورلر.
 زیرا « قوراندەر » نه اولدیغنی ده بیلورلر مواد
 مغذیه نه اولدیغنی ده ! حفظ صحتہ دائر اوقدر
 تعبیرلر قوللانورلرکه سـوزلرینه باقسه کز
 کندیلرینی برر یاریم طیب ظن ایدرسکیز ♦
 فقط یاری بحق علمدن جناب حق صیغنه ایدر.
 چوقولاتونک مغذی اولدیغنی او کر نه رک هنوز
 سـوتدن کسـیلـه جک جاغی بولان چوجغنی
 چوقولاتو ایله حسن تغذیه ایده جکم دیه
 اولومنه سبب اولان بر بابا بزم اقربامن میاننده
 کورولمشـدر. احبـامنـدن بریسی ده انکلیز

اطوارینی طاقنه رق بفتکدن روزیفدن بشقه
یمک یمامک غیرتیه برچوق معدده وباغرضاق
خسته لکرینه دوچاراولمش ایدی ده « حکیم »
عنواننه بحق مستحق اولان برایکی اطبا
اویچاره بی سبزه اکلی مجبوریتنه کوج حال
ایله ارجاع ایدمه بیلیمش لر ایدی .

لطاائفدن ، فقط استدلال حقیقه خدمت
ایده جک لطائفدن اولق اوزره یوزلرجه
امثالی نادر اولمایان شوخلاتق عجیبه بی نظر
حکمتکزه عرض ایدرزکه اون اون ایکی یاشنه
کلش اولدیفی حالدده بویلری بشرالتیشریاشنده کی
چوجقه لردده کورولمک لازم کلن بویلردن
قیصه در . چونکه ییللرجه مدت باجاقلری
آره سنه بر بوغچه مردار و ملوث پاچاوره طو -
لدرمقدن باجاقلری اکر یلمش وا کثراوقاتده

قوجاقدن دوش-مدیکی وقوشوب اوینامقدن
 منع ایدلدیکی ایچون اعضاسنه انبساط کلامش
 وبناء علیه کیتدجکه بیویه جکنه کیتدجکه کو-
 چولمش-در . قرن شیشمش ، بی-ون وقولار
 وباجاقلر اینجلمش ، دیش-لر دوکولمش ،
 جب جیلز برشی اولدیفی حالدہ سیپاسنه
 عادتا برقارتلق طوری طاری اولمش . ترسیمه
 شایسته ! بوزوالیلر نهدن بو حاله کلمش-لر ؟
 خلقتده بویله شیلر وارمی ؟ بو حال محضا
 آنلره باقانلرک بیلکیلرندن نشأت ایتمشدر .
 ایشته اوبیلکینک دیکر بعض علامتلی حالا
 چوجغک اوزرنده کوریلور . یدی دلیکلی
 مائی بونجقلر ، چتسال چیتلنیک چوپلری ،
 شاب پارچه لری ، خرما چکر دکندن یاپلمش
 نعلینلر ، مسکوک وغیر مسکوک آلتونلر و سائر

وسائره بی چوجغك اوستنه باشنه آصمشلر .
کویا نظر دکسون دیه ! اوته طرفده سوکلون
کی چوجقلر طورر ایکن نظر بو مخلوقات
عجیبه په تنزل ایدرمی ؟

« او یله ایسه چوجقلره نصل باقلم ؟ » می
دیدیکز . اوتقصیلا تک یری بوراسی دکلدر .
بز بوراده بابالرك آنالرك وظائفي اوزرینه
یالکیز انظار دقتی جلب ایده جکیز . اووظائفي
فعلاً ومادهٔ نصل ایفا ایده جکلرینه دائراقضا
ایدن تعلیماتی ده زماننده ویرنده ویرمهکه
چالشه جغز .



بابا و آنانک اولاد حقنده کی وظائف مادیه سی
بادیٔ نظرده پک ساده کورینور ایکن بو
وظیفه بی حقیقه ایفا ایتمک ایچون بیلکی یه اولان

احتیاج نظر دقتمزی جلبه حقیقه سزادر .
 چوجغه باقه جغز ، دکللی ؟ باقه جغمز چوجغك
 ماهیت عضویه و روحیه - نی اول باول اوکر -
 نمدکدن ، بیلمه دکدن صوکره نصل باقه جغز ؟
 شویله وهله ۰ برچوجق والدس - سندن یالکز
 دیلمنز طوغمقله قالمایوب هم کور هم صافر
 طوغار . ذوق ولس حس - لرندن ده محروم
 اوله رق طوغار . بالاخره بونلری مدت
 طبیعی لری ظرفنده تدریجاً اکتساب ایلر .
 حواس مذکور هك بعضلری پك تیز منبسط
 اولور ایسه ده بعضلری آیلرجه وهمان ده ییللرجه
 مدت صوکره انجق تماماً منبسط اوله بیلورلر
 دیه ك اولور ایسه ك پك چوق اما پك چوق
 بابالر بوسوزی ایلك دفعه اوله رق ایشتمش
 اوله جقلرینه شبهه ایده میز . اوت بو حقایقه

ذاتاً واقف اولمش بابالردخی نوادر دن دکلا درلر .
 نه مو طلی او بابالره ، آنالره که اولادی حققرنده
 وظیفهٔ مادیه لرینی بیله رک ایفا ایدرلر . نه
 بختیار در او چو جققر که بویله بر چفت آنا و بابانک
 تحت حمایه سننده بیورلر . زیرا وظائف مادیه
 لرینی اکا متفرع اولان حقایق علمییه و دقایق
 فنییه بیله رک ایفایه بحق مقتدر اولان ابوین
 وظیفهٔ معنویه لرینی دخی بویله بیله رک ایفا
 ایده جگله ی جهته بونلرک همت و حمایه سیله
 وجود عالیه آیق باصان چو جققر جسماً قوی
 و سالم اوله جققری کی روحاً دخی قوی و سالم
 اولورلرده او یله اقشاملری اورتعلق قرار -
 دقدن صـ و کره کویا طبیعت عالم دکشمش
 وجهانی بر طاقم ارواح خبیثه استیلا ایتمش کی
 شورایه بورایه یالکز حقیقه مامق و چهارشنبه

قاریسی وغول یبانی وسائر متوہمات قورقو -
سندن کوز آچہ مامق کی بلیہ لردن مص - ون
قالورلر وبناء علیہ حیاتلرینک لذتی بحق
بولورلر .

اوت ! آنا و بابا وظیفہ لرینک ایکنجی
قسمی ده وظائف معنویہ ایدی، دگلی؟ وظائف
معنویہ ! وظیفہ نک بوقسمی حقیقہ وظائف
مادیہ یہ اصلاقیاس قبول ایدہ میہ جک قدر بیوک
ومہمدر .

برازجق دقت ایدیلہ جک اولور ایسہ
کوریلورکہ اولاد حقندہ کی ایلک وظائف مادیہ
حیوانات سائرہ نزدندہ دخی مرعی الایفادرہ
ہمده بالخاصہ والدہ لر طرفدن او قدر بیوک
برشفقتلہ مرعی الایفادرکہ بعضاً طارلق وقتندہ
یاورولرینی طویور مق ایچون کندیلری آجلقدن

اولمك وياورولرینی قورومق ایچون کندیلری
 صوغوقدن طومق درجه سنده فدا کارلقلر
 حیوانانندن پك چوق والدم لرده کورولمشدر.
 هله هیچ بردیشی حیوان یوقدرکه یاوروسنه
 هرکیم طرفندن اولور ایسه اولسون تعرض
 ایدلده دفع تعرض ایچون بتون جسارت
 فدا کاریسینی طویلاماسون ! برعاجز قولو -
 چقه نك یاورولری اوزرینه برقوجه کوپك
 صالديره جق اولسه او عاجز ط-اووق
 قنادلریله غاغه سیله ، پنجه لریله ، کوپکه ،
 او کندیسندن یوزقات قوی اولان دشمنه
 قارشو مدافعه دن یوزچویرمز . بومثالو
 مبارزم لرده دشمنك مغدور پنجه تعرضی اولان
 یاورولرینك هلاکی آجیسی یورکلرینه چوکوپ
 تاف اولان والدم لره بیله تصادف اولمشدر.

عجبا حیوانات سـاژده آنا و بابالرك و با
 خصوص آنالرك اولاد اوزرنده برنوع وظیفه
 معنویه لری ده یوقیدر؟ وظیفه معنویه که اربابی
 بو عالم معیشتده بخنیاار و بی نوعی میـاننده
 ممتاز و معتبر ایدمـك شـیلری او کرتـمـكـدر ،
 بونـك بر قسمی بر درجه یه قدر اواسون حیوانات
 سـاژده دخی وار اولدینی حکمـادن پـك
 چوقلرینـك نظر دقلرینی جلب ایتـمـشـدر .
 خانه لر مزده آوجی بر کدینـك بر فندقی فارمسی
 طـوتـدیغنی و آنی بردن بره اولدور میوب
 یاوروسنـك اوکنه صـالی ویرهـرك فارمـقـاچق
 ایستـهـدکـه یاورویه جمله لر ایتـدیردیکنی پـك
 چوق دفعه لر کورمشزدر . عجبا کندینـك
 بو حرکتی عادیجه براویونجـاقیدر ؟ بوکا البته
 احتمال ویرهـمـسـکنز . بوایونجـاق دکل ، بر

تعلیمدر. کندى یا وروسنه آو جیلق او کرتیور.
 او بیلیور که کدیله عالمنده مدارتمیز آو جیلقدده در.
 حیواناتده بویوله کی اح-وال پک چ-وق
 کوریلور. اکلاشیلیور که اولادینی اعاشه
 وحمايه صورتنده کی وظیفه مادیه دن ماعدا
 تعلیم و تربیه صورتنده برده وظیفه معنویه -
 قابلیت حیوانیه لرینک مساعده سی در جه سنده -
 بعض حیواناتده دخی وارد در . حیواناتک
 اشرفی اولدیغمز حالد بوظیفه نك نوع بشرده
 بولونمامسی خیالاردن بیله کچه من .
 کتابلرده غزنه لرده تربیه اطفاله دائر
 به قدر کورل شملر او قوم شمسکزد در . بونلرک
 اک چوغنده اطفالک ایلمک مکنتی ، ایلمک تربیه
 خانه سی آغوش مادر اولدینی سوبله نور .
 بوسوز یا کلش دکلد در . فقط او وظیفه یالکیز

والدیه منحصر اولمقله قالماز . واقما حضانت
یعنی چو جنه باقمق شرعاً والد لره تعیین اولنمش
بروظیفه در . ارکک چـ وجقار یدی وقز
چو جقار طقوز یا شلرینه کلنجیه قدر تربیه لری
والد لره تخصیص بیورلمشدر . والد و پدر
یکدیگرندن مفارقت ایتمه لر اولادک حضاتی
شرعاً والدیه تودیع اولنوب پدر بوکامخالفت
ایده مز . ارکک اولادی آنجق یدی وقز
اولادی دخی طقوز سنه والد لری یاننده
قالدقدن صوکره کندی تحت تربیه سنه آلمق
حققی قازانمش اولور . بو بویه در اما والد
کندیسی نه قدر تعلیم و تربیه کورمش ایسه
اولادینه دخی آنجق او قدرینی او کرته بیلور .
پداغوقلردن یعنی تربیه اطفال حکمتی آریان
مدققلردن پک چـ و غی دخی بو حقیقه نظر

دقته الهرق • ای اولاد یتشدیرمک ایچون
 ای والدلر یتشدیرملیدر • دیمشدر .
 اما ای والد اولهرق یتشدیریله جک مخلوقلر
 دخی اوصورتده یتشدیرلمزدن اول یینه اولاد
 دکللی ایدیلر ؟ ای والدلر هر حالده ای تربیه
 اولنان اولاددن یتشدیریله بیلوب اولادک ای
 تربیه سی یینه ای یتشدیرلمش والدلره متوقف
 قالمق بردور باطل تشکیل ایدر . شو صورتده
 تحقق ایلرکه اولادک تعلیم و تربیه سندن عبارت
 بولنان وظیفه معنویه والد قدر و بلکه آندن
 زیاده و ترقیات مدنییه نقطه نظر نجه والدلردن
 اقدام پدرلره عائددر . هر ملتک تاریخ ترقیسی
 اثبات ایدرکه هر زمان و دنیانک هر یرنده
 شهره ترقیه قادینلردن اول ارککلر آیاق
 آتمشدر و او شهره سعادته قادینلری دخی

يُذَوَّب ، سَوْر و كَلَه يَوَّب كَو تَوْر مَشْـلَر دَر . مَعَ
هَذَا قَادِي نَلَرَه بَو يَوْلَدَه كِي دَلَالَتـِدَه هَر مِلَّتـِـك
رَجَالِي يِنَه تَمَامِيْلَه مَوْفُق اَوْلَه مَامَشـلَر . زِيْرَا
تَارِيخ بَزَه بَر چَوُق مَتَرَقِي وَ مَتَمَدَن مِلَّتَلَر كَو سَتَرـ
يِيوْر كَه آنلَر دَه بِيَكَلَر جَه مَشَاهِير رَجَالِك شَان
و شَهْرَت مَوْفَقِيَاتِي اِخْلَافَه يَادَكَار قَالَدِيغِي حَالَدَه
نِسْوَانَدَن هِيْچ بَرِيْسـنَك نَامِي بِيْلَه قَالْمَامَش
و بَعْضَلَر نَدَه آز چَوُق بَر نَام بَر اَقَه بِيْلَمَن نِسْوَانَك
مَقَادِيرِي رَجَالَه نَسَبَتْلَه يُوْز دَه وَ حَتِي بِيَكَدَه
بَرَه بِيْلَه وَاَرَه مَامَشـلَر . بَوْنَدَن يُوْز سَنَه اَوْل
رُوس اَدِيْب مَشْهُوْرِي پُوشْكِيْن رُوس قَادِي نَلَرـ
يِنَك اَوْ قَوِيُوْب يَاز دَقَلَرِي زَمَانِي كِيْمَسَه كُورَه
مِيَه جَكْنِي دَر مِيَهـاَن اِيْلَه يُوْر اِيْدِي . حَال بُوَكَه
رُوسِيَه يِنَك بَر قَاج يُوْز سَنَه لَك بَر تَارِيخ تَرْقِيْسِي
بَوْلـنـوْب آنَدَه يُوْز لَر جَه رَجَال مَشْهُوْر يِنَك

اسامیسنه تصانف اولنیور ایدمه . هر ملت
 بویله در . الیوم قادینلرینک دخی ترقیاتی
 غبطه منری تحریک ایدن ملل متمدنه ک
 کافه سینده رجالک ترقیسنه نسبتله نسوانک
 ترقیسی پک کیروده در . آلمانیا و فرانسه
 وانگلتره و آمریقاده هنوز پک یقین برزماندن
 بری قادینلردن طیب آووقات و رسام کی
 اهل هنر یتشمکه باشلادیغنی کوریورزه . لیکن
 بر قادین طیبک و یاخود آووقاتک ارککلر
 درجه سینده کیف مایشاء اجرای صنعت اتمه لرینه
 تمامیه مساعدده اولندیغنی هنوز کوره میورزه .
 آووقات شهادتنامه سنی حائز اولان ارککلر
 ایچون دعاویده وکالتدن ماعدا حاکمک موافقی
 دخی آچیق اولدیغنی حالده ینه اوایل بر آووقات
 دیپلومه سنی حائز اولان قادینلرک حاکمک

دکل آ دعاویدہ وکالتلرینہ بیلہ مساعده اولما۔
 یور . رجالدن اولان اطبایہ قادینلرک ہر نوع
 خستہ لکارینک تداویسی ایچون مساعده
 اولندیفی وبونلر اہلک بیلہ ایتدکاری حالہ
 قادیندن اولان اطبایہ ارککلرک ہر نوع خستہ
 لکارینی تداوی ایتملری ایچون مساعده
 ویرلیور . پوستہ وتلغراف وشمندوفر ادارہ۔
 لری کبی یرلردہ بعض خدمتہلردہ قادینہلر
 استخدام اولندقلری حالہ رأس ادارہ یہ تقرب
 بیلہ ایدہ میوزلر .

مکاتب ومدارسدہ اشاغیککی صنفلر ایچون
 شمدیلردہ ایجکہ چوق معلمہ یتشدیککی حالہ صنوف
 عالیہ ایچون ہنوز بیوک معلمہلر استخدام
 اولندیفی ہیچ برطرفدن خبر النہ میورہ
 اوروپا و آمریکا ملل مترقیہ سی یوزلرجه سنہدن

بری ترقیه و بومیانده اولادذ کورایله برابر
اولاد انائی دخی تربیه و تعلیمه بیوک بر قدرت
وفدا کارلق ایله غیرت ایتدکاری حالده
ایش بویله اولورایسه شهره ترقیده انلرک
قطع ایتدکاری مراحمی هنوز قطع ایتماش
اولان خاق نزدنده قادینلرک مرتبه سی نه دن
عبارت اوله جغنی تأمل و ملاحظه اوقدر
کوج اوله ماز .

حقیقت بوملل مترقیه نزدنده قادینلرک
کمالات ذهنیه و روحیه سینه امنیت و اعتماد هنوز
اوقدر آذرکه نوع بشرک بر نصف جمیلانی
تشکیل ایدن بوسنندن نصف دیگرینک حوایج
معنویه سینه حسن خدمت و او خدمتده مو-
فقت بکلنمک شویله طورسون یالکز کند
صنفلری حقنده بپاه کفایتلری تسلیم اولنه مایوره

بونلر بر صباوت دائمه حالده تصور اولنيورلر .
 صنف ذ كورك حائز اولديني حقوق مدنيه نك
 بر چو غندن صنف انسان محروم بر اقليور .
 شوصوك سـنه لرده قادينلرده كوريلن ترقيات
 نسبييه بي نظر انصافه آلا نلر نوعيت بشريه نك
 شوايكي نصفي ، شـوايكي صنف آره سنده كوـ
 ريلن بوقدر بيوك فرقي بكنه ميهرك نسوانك
 حقوقني براز حق اولسون آرتدير مغه چالشيورلر
 بوغيرتده بولسانلره « فمينيست » دنيايور .
 بونلر لسانلر يله قلملر يله حقوق نسوانك
 تزييه دي لهنده نشر افكار ايديهـ ورلرده
 مدنيتك اركان اصليه وقديمه سندن اولان
 خرده اندیشان عقلا بونلر ك او كوزل و حقلي
 سـوزلرينه همان هيچده حواله سمع قبول
 ايتميورلر ! لـكن مسئلهك بوجهتي بزم

بخدمتک خارجنده در . بن بخدمتک خارجنه
حقیقتمایهلم :



اولادک تربیه معنویه سنه آنالر قدر ،
حتی نسواننده هتوز بوقابلت اولمایان خلق
وفامیلیالر کوره آنالردن اول وانلردن زیاده
بابالر بورجلیلدرلر ، زیرا بویله اولان خاق
وفامیلیالرنزدنده — اولجه دخی بیان اولندی
وجهله — قادینلر برصباوت دائمه حالنده
تصور اولنه جقلرندن انلرک اولادی تربیه
ایتمه لری شویله طورسون کندیلاری دخی
ارککلرک نظارت صریحانه لرینه محتاج
قالیورلر .

ای اما بابالرعائله خلقنک ارزاقی قازانمغه می
چالشسونلر ، یوقسه اولادینی واولادایله برابر

قادیئلرینی ده تربیه ایله می اوغراش سونلر؟

واقعا بومسئله انظار دقت واهمیتی جداً
 دعوت و جالب ایده جک مسائلدندر . زیرا
 قانون خلقتده ایکی ال برباشه خدمت ایچ-ون
 مکلف اولدینی حالد هر ملتک قانون معیشتنده
 ارککک ایکی الی کندی برباشندن ماعدادها
 برچوق باشلر ایچ-ون چالشمق مکلفیتی التنه
 کیرمشدرد . بوکا ضمیمه برده تربیه وظیفه سی
 ارککلره حصر ایدلک لازم کلورایسه نوع
 رجال استعفایه قدر مجبورییت التنه صو -
 قولمش اولور . ارباب تدقیق بونی ده دوشو -
 نمشلر ، بونک ایچون ده برچوق یوللر بولمشلر .
 بولدقلری یوللرک اک قدیم زمانلردن بری
 اک ایشلکی مکتبلر اولمشدرد .

مکتبلر ! بر سرنامه که آنک التند ، جلدلر

طولديره بيله جك ملاحظات ومقررات طوللا-
 نه بيلور. ذاتاً طوللا تمشدردده ! في الحقيقه
 جلدلرده طولدير مشلر ! سزه « مكتبلك لهنده
 بولنانلر قدر عاينده بولنانلرده واردر » ديه.
 جك اولور ايسهك شاشمارميسكز ؟ مكتبلك
 عاينده ستونلر طوليسي يازى يازانلره نه نظرله
 باقارسكز ؟ بوكي شيلرده دوچار حيرت اولوب
 قالما مليدر . بر شيئك لهنده بولنانلر نه دن
 طولايي حكم ويردكاريني ا كلامد قجه اوشيئك
 لهنده سويله نن سوزلره قاپلمقده صافدرو-
 نلقدر عاينده سويله ينلرك نه دن طولايي
 او حكملى ويردكاريني آرايوب طسارايوب
 ا كلامه دن آنلره قاپلمقده . بز بوراده
 مكتبلك عاينده سويله نن سوزلرى مسكوت
 عنه براقه جفزه . زيرا اوسوزلرى سويله ينلر

کندی مکتبلرینی او یولده کی انتقاداته ،
 او صورتده کی مؤاخذاته لایق کوردکاری ایچون
 سویله مشلر در . او احوال سیئه ایسه بحمدہ
 تعالی بزم مکتبلر مزده هنوز اوج بیله
 کوستر مامشلر در . بناء علیہ سیئات مذکورہ
 هیچده بیلمامک انلری او کر نمکدن اولادر .
 « عارف اولماز کیم بیلوردنیا و مافیانہ در . عارف
 اولدر بیلمہ یہ دنیا و مافیانہ در » بیتک صدق
 ایشته بویله سیئات عالم چہتنہ عائددر . اوفنا
 لقلری او کر نمامک بیلمامک عین عرفاندر .
 مکتبلر اوت تربیہ اطفال ایچون بولنان
 یولارک اک قدیم زمانلردن بری اک ایشلکی
 مکتبلر اولمشلر در . انسالرک اک چوغی آنجق
 کندی حوایج مادیہ و معنویہ لرینہ لزومی
 اوله حق قدر تعالم ایدر لر . بشقلرینہ دخی

او كرتە جك قـدر قوت پك از كـمسـه لـرده
 بولنور. بناءً عليه ملل متمدنه انسانلردن بر
 قسمنى تعليم و تربيه اطفاله مأمور اولمق اوزره
 آيـرـمـشـلـر . بولـره تربيه و تعليم قدرتى حاصل
 ايتديره رك بعده كنديلرني بووظيفه مهمه
 و مقدسيه تعيين ايتمشلر. بو حـالـده معلـمـلـر اولاد
 حقهنده وظـائـف معنويه نك ايفاسى ايجون
 پدرلرك و كيللرى اولمشلر . پدرلر يالـكـنـز
 عائلهلرينك مدار اعاشهـنى قازانمق مجبوريتى
 التنده قالمشلر. مع هذا مكتبلرك كشاديله پدرلر
 حق ووظيفه تعليمدن مجريد ايدلامـشـلـر .
 تعليم اولاده قدرتى اولانلرينه ترجيحاً
 كندى اولاديني كنديلرى تربيه حقنى محافظه
 ايتمشلر . ارباب تدريس توكل ايدلاكلرى
 وظيفه مهمه ي ايفايه هم بحق مقتدر و همده

جداً ساعی اولور لر ایسه وظیفه لرندن منتظر
اولان نتیجه نك تمامیه حصوله کله جک نه شبهه
یوقدر . مکاتب عمومیه هر زوده لزوم ولایقی
درجه سنده تنظیم ایدلمش لر ایسه اوراده معارف
وانك ضمننده تربیه مدنیه دخی ترقی ایتمشدر .
اما مکاتب عمومیه نك لزوم ولایقی درجه سنده
تنظیمی مسئله سی زیاده سیله جالب نظر اهمیتدر .
مکتب لرك یالکز وجودی آنلردن منتظر اولان
نتیجه یی تأمین ایده من . از جمله ایشته بزده
عصر لر دن بری مکاتب ابتدائیّه موجود ایدی
اما بونلردن شم دیککی مکاتب جدیده قدر
استفاده اولنه بیلور می ایدی ؟ تحقق ایدیور که
مکاتبك تنظیمی دیمك بونلرده تعلیم و تربیه
اطفاله بحق مقتدر اوله بیله جك معلم لر وانلرده
بو وظیفه یی ایفایه صالح واسطه لر بولنق دیمکدر .

نانکورلر بيله انكارنده دوچار حيا اولمق
لازم كلوركه بر زماندن برى بزده مكاتبك
تنظيمى امرنده برچوق همترلر وعنايتلر بذل
وبى دريغ سيوريلىور. بوكونكى كونده كرك
مسلم وكرك غير مسلم اطفال عثمانيه نك تعليم
وتربيه لرى ايچون كرك طرف حكومت سنيهدن
وكرك عائد اولدقلى اوقاف ايله برده جماعتلر
طرفندن صرف اولنان پاره لر جمع ايدلسه
معارف وتربيه عموميه ايچون بز عثمانيلر اك
زياده مصرف اختيار ايدن ملتلدن عد
اولنورز. بوهمترلر بوغيرتلك الحق فائده سي
دخى كوريلىور. اليوم خلقمىز نزدنده اوقو-
مق پازمق كركى كبي منتشر اولشدر. زيرا
شهر وقصه به لر مزدن ماعدا كويلرده وهنوز
باديه لرده كزن عشيرتلرده بيله پيدى مكيبلر

آچلمش و بریاندن ده آچلمقه ده بولمشه در .
 بوندن اون بش یکر می سینه اول خدمت عسکریه
 ایچون اسملرینه قرعه شرعیه اصابت ایدرک
 قشله لره کلن افراد مکلفه آره سنده او قومق
 یازمق بیلنلر عادتاً نوادر دن اولدقلری حالد
 شم دیلرده بعض ولایت لره قرعه افرادی
 میاننده همان یوزده سکرز اون قدرینک قرائت
 و کتابته مقتدر اولدقلری چشم شکران ایله
 کور و لمیکده در . لکن بوهمم و عنایاته منتقدارانه
 و قدر شناسانه تشکرله برابر بو کون تعلیم و تربیه
 ایچون لازم کلن اسباب تمامیه تدارک ایدیلوب
 بتمشدر دیه حکم اولنه بیلور می ؟ ترقی معارفه
 ایدیلرک خدمت آرتق قالدیغنه قناعت
 ممکنمیدر ؟

بو قناعت بزم ایچون دکل آ اوروپا

و آمریقا-انك يوزلرجه سینه دن بری بویولده
چالشه کلمکده بولنان ملنلری ایچون بیله ممکن
اوله مایور . آنلر بیله حالا چالشیورلر . تعلیم
و تربیه یی دها زیاده تسهیل و تسریع یوللارینی
آرامقدن بر آن خالی قالمایورلر . رسمی و خصوصی
برچوق تدریس خانه لری و بونلرک کونا کون
پروگراملری و او پروگراملری موجب نیجه تعلیم
و تربیه ایچون بیک درلو کتابلری نمونه قوللقسیمو -
نلری فلانلری بولندیغی حالده یکیدن یکی به
درس خانه لر و پروگراملر و او پروگراملر
موجب نیجه یکی کتابلر تصور ایدرک بو امر خیرک
اربابی مسابقه یه چیقیشیورلر . شوسطرلری
یازدیغمز صیره ده پارسده طبع اولنان فیغارو
غزته سنک ۴۰ اغستوس سنه ۱۸۹۹ تاریخی
نسخه سنده « مستقبلک اصول تعلیم و تربیه سی »

سرنامه سیمیه بر مقاله او قودق که تعلیم و تربیه بی
 ماده برقات دها تسهیل و تسریعه چالش-ان
 برفرقه جدیدنک مساعیدنق انتقادده دائردر.
 شمیدیلرده برط-اقم چوجق تربیه-جیلری
 چوجقلرده بیلکی پیداسنه «ریاضت ذهنیه»
 ووجودلرنده متانت و اوضاع و حرکتلرنده
 حسن و عقب-ولیت پیداسنه دخی «ریاضت
 بدنیه» تعبیر ایدرک معلومات پیداسی ایچون
 بیشمز توکنمز کتا بلر تدریسیمیه چوجقلری
 اتعا بدن ایسه کتا بلردن اله جقلری معلوماتک
 الک چوغنی باغچه لرده، اورمانلرده، طاغلرده
 نهرلرده، دکز لرده، کویلرده، قصبه لرده،
 حتی ممالک بعیده ده، قش-الرده، قلعه لرده،
 کیلرده و الحاصل معلومات بشریه نک تعلقگاهی
 اولان هریرده کز دیروب کوره کوره

اكتساب ايمه‌لری جه‌تی ترجیح ايله مکه‌ده
بولمه‌لریله بویولده‌کی تعلیم و تدریسک اسکی
اصوله ... امدقت ایتلی ! آرتق آنلرجه
« اسکی » عد اولمان و بزجه هنوز باشلانماش
بولمان اصوله نسبتله نافعمی یوقسه مضرمی
اوله جغنی انتقاده دأردر .

نه حاجت ؟ معارف عمومیه امرنده بوغیرت
حکومت نسویه من نزدنده دخی موجود و مشا-
هددر . صیق صیق یکی قومیسئونلر تشکیل
ایدیلرک درس پروغراملری یکیدن یکی‌یه
تدقیق اولمایورمی ؟ علوم شتایه دأر موجود
اولان کتابلرک کیتدکجه ده‌ا اییلرینی تدارک
ایتمک ایچون چاره‌لر دوشونلمیورمی ؟ بو خدمت
نفع عمومی‌یه عائد خدمات حقیقیه ترقی
پرورانیدن اولدینی ایچون بونده کنه‌دیسنی

آرزو ارباب کورنلر قدرتلی یتدیکی قدر
 معاونت فکریه و قلمیه ده بولنیورلر. بونلرک
 شو غیرتلی طرف حکومت سنیه دن تحسین
 اولنیور. ارباب خدمت رتبه لرله نشانلرله
 تلطیف بیورلدقن ماعدا میدان قویدقلی
 اثر قبول اولنورسه مکافات نقدیه ایله دخی
 تلطیف بیوریلنیورلر. ایشته بو همتلر، بو غیرتلی
 اولادک تربیه معنویه سی امرنده پدرلرله عائد
 اولان وظائف ایفا سنه توکیل ایدیلن مکتبلری
 او وظیفه مهمه و مقدسه یی بحق ایفایه مقتدر
 اوله بیله جکلری درجه مکملیه ایصال ایچون
 التزام بیوریلان همم و عنایات معارف پرورانه
 دندر. طوغریسی عظیم تشکر اولنور. بزم
 غیرت عاجزانه من دخی من غیرحد بواثره
 اقتفادن عبارتدر.

اوت بابالرك آنالرك چوجقلرينه قارشو
اولان وظائف معنويه لرینی ایفا امرنده مکتبلر
آنالرك بابالرك وکیللریدرلر . بونقطه نظر دن
مکتبلر و باخصوص لیلی مکتبلر برعائله معنويه
حکمنی الورلرکه مدیرلر معلملر مبصرلر فلانلر
او عائله لرك بابالری آنالری ولالالری فلانلری
حکمتی الوب شا کر دان دخی بونلرك
چوجقلری مخدوملری اولق صورتی آلورلر
لیلی مکتبلرك یعنی انلر درونلرنده کی خلقلک
بویله برعائله معنويه تشکیل ایتلری او قدر
طوغریدرکه تعطیل زمانلرنده شا کردلر
اصل عائله طبیعیلری نزدینه کلدکلری وقت
عادتا مسافر صورتنده کلش اولورلر.
مکتبلرك بودرلوسی او قدر نافع ومهمدرکه
خلقلک تربیه عمومیه سنی صورت مطلوبه

جدیده به تحویل ایچون بوندن بشقه چاره
 یوقدر دینسنه مبالغه به حمل اولنه
 ماز . زیرا یالکن نهاری اولان مکتبار
 چوجقلره علم تحصیل ایتدیرمک حصو
 صنده بیله لیلیئر درجه سنه واره میه جقلری
 محتاج تفصیل اولمایوب هله تربیه به هیچ ده
 خدمت ایده میه جقلری مستقلاً بر تنبعه
 لایق مسائلدندر . صباح اقشام اوچردور
 ساعت مکتبه بولنق ایله برچوجق بابا او جا غنده
 کوزلری آچیله لیدن بری آلمش اولدینی تربیه بی
 مکتب تربیه سنه تحویل ایده من . او ساعت لر ظرفنده
 معلملر چوجقلره تربیه به دائر بر جوق
 وعظملر نصیحتلر ویررلر ایسه ده بونلر قرائت
 و کتابت تعلیمی خصوصه تنده کی تعریفلر کی
 چوجقلرک بر قولاغندن کیروب دیگرندن

جیقارلر . پك جزؤی بریر طوتمش اولسه لر
 بیله چوجقلر خانه لرینه عودتله رنده فاملیا
 احوال عمومیه سی میاننه قاریشه رقی انلری
 بالیکلیه اونو تورلر . عائله لر چوجقلری تربیه یه
 صالح بر حالدده دکل ایسه لر واقعا مکتبلرک
 آنلره وکالتی ضروریات قطعیه دندر . او حالدده
 نهاری مکتبلرک بیله چوجقلره ویره جکلری
 آزچوق تربیه البته کمال منتهی تلقی اولنور . اما
 ایش مکاتب عالییه درجه سنه وارنجه بتون بتون
 بشقه لاشور .

مکاتب عالییه نك ایدم جکی نه تعلیم نه ده
 تربیه فاملیالر نزدنده ممکن ومیسر اوله ماز .
 ذاتاً مکاتب ابتدائیة نهاریه نك تعلیم و تربیه
 لرینک بحق ایفاسی بیله هر پدر ووالده یه
 میسر اوله مایوب بوکا مقتدر اوله بیله جک

آنالردن بابالردن متشکل عائله لر انسه انلرك
 انك بختيار قسمندن عد اولمليدرلر . ايش
 معارف عاليه طيانشجه تعليم و تربيه نك
 اودرجه سي آنالرك بابالرك قدرتلرينك ده
 خارجنه چيقار صلاحياتلرينك ده ! معارف
 عاليه شسا كرداني عمرلرينك اوچاغلرينه
 واصل اولمش آدملردركه بونلر آرتق « آنا بابا
 قوزيسي » عد اولنه مازلر . بلكه هيئت اجتماعيه
 اعضاسيدرلر . هيئت اجتماعيه ايسه عائله لردن
 متشكلكل بر هيئت دكلى ؟ عائله لرده ذمام
 حكومت پدرلرك انده بولنوب اولادك
 تربيه سي اوزرنده كي وظيفه ايسه انك هم
 وظيفه سي هم ده حقيدر . اما بوحق و بو وظيفه
 اولادك طفوليت و صباوتلري هنكانه
 مخصوصدر . چوجقلر اوچاغلري كجوبده
 معارف عاليه ايله اشتغاله احتياج كوره جيكي

ياشاره وارديني زمان آرتق كندى عائله
 طبيعیه سندن چيقوب « اهالی » دینلن اویوک
 عائله معنویه داخل اولمش و « حکومت »
 دینلن اوپدر سیاسی و معنویك حق تعلیم
 و تربیه سی التنه کیرمش اولور . اویاشدن
 صکره چوجقلرك اكمال تعلیم و تربیه سی وظیفه .
 سی ده حق ده اوپدر معنوی و سیاسی به انتقال
 اتمش بولور . بوسیدندركه دولت شاکردانی
 مکاتب عالیله ده اسکان والباس و اعاشه
 ایدر . بناءً علیه دولتک سایه لطف پدرانه
 سنده یتشمش اولان شاکردان دخی نوحس
 شکران و منتله دولتنه خدمت ایتک مجبوری
 التنده بولور .

معارف عالیله نک « اعدادیه » و « انتهاییه »
 دیه ایکی قسمه آریلان ایکی سنده دخی شاکر .
 داندک عائله طبیعیه لرندن تفریق ایدیلوب داخل

مکتبه اسکان و اعاشه لرینه جهانک هر طرفنده
 لزوم قطعی کورلمشدر. «ایتدائییه» و «رشدیه»
 قسم لرینه منقسم اولان معارف ایتدائییه ده بیله
 اطفالک عائله طبعیه لرندن بالتفریق مکتبلری
 داخلنده اسکان و اعاشه لری دخی پک چوق
 یرلرده ضروریاتدن عـد اولنمشدر یا ؟ فقط
 معارف عالییه جه بو حکم عمومیدر . هله مسالک
 عسکریه ده استیخدام اولنه جق کنج لر ایچون
 بوندن بشقه طریق تعایم بولنه مامش و بوضورت
 تعلیمه هیچ برکیمنسه اعتراض ایده مامشدر .
 برکنج آدم برضابطک مکتبلرده تحصیل ایتدیکی
 علوم و فنونی کندی خانه سـنده برصـورت
 خصوصیه ده تحصیل ایده جک اولسه بر «عالم»
 عدا اولنه بیلور . فقط ممکن دکل بر «عسکر»
 عدا اولنه ماز . عسکر اولق ایچون نظامیه

قشالاری بر و عملیات مکتبی و اولدینی کبی
مکاتب اعدادیه و حربیه عسکریه دخی هم
نظریاتی هم عملیاتی جامع مکتبلردر . اوراده
حیات و معیشت عسکریه داخلنده سینه لرجه
یا شاملی که طبیعت عسکریه بوشا کردلر ایچون
طبیعت ثانیه حکمنی آله بیلسون .

فقط ایشک بو معارف عالیه جهتی بزم
دائرة اشتغالزک بالکلیه خارجنده در . شمیدیکی
حاله کوره معارف ابتدائیه بیلل بزم بمحتمزدن
خارجدر . بزم شمیدیلک میدان اشتغالز نره سی
اوله جقنی بیاورمیسکمز ؟ چوجققلرک طفولیت
صحیحه سی چاغی ! چوجققلری مکاتب ابتدائیه یه
قاج یاشده ویررسکمز ؟ اسکیلرک برسوزینه
کوره عمرندن درت سینه ودرت آی ودرت
کون کچدکدن صکره می ؟ بو عاده رعایت ایدنلر

اولادینک او یولده کی مروتنی کورمکده
استعمال ایله یئلردر. اویله یا؟ دو کون یاییله جق،
آمین آلایلری ترتیب اولنه جق، قز اولسون
اوغلان اولسون چو جق التونلره اینجولره
الماسلره مستغرق اولدینی حالد آت ویاخود
عربه یه بندیریلوب الهیلر ایله آمینلر ایله مکتبه
کوتوریله جک، لقمه لر پلاو زرده لر اطعامی
و عطیه لر توزیمی ایله بدأ رسمی اجرا اولنه جق،
ابوین ایچون بو آز مروتیدر ؟

بو حقیقه بر مروتدر اما بزی مشغول
ایدن وظائف مغنویه بختنه هیچ بر تعلق
اولمایان مروتلردندر . ولو سالم درت بحق
یاشنده چو جفی مکتبه ویرمک حالا بو کونکی
اصول معارفنزه دخی مقتضی فرض اولنسون.
اویاشه قدر عجبا بز چو جقلر منزه نه اوکرته .

بیلورز؟ بزجه چوجقلرك هييج اولمازايسه
 التى ياشنى اكمل ايمه لرندن اول مكتبه
 باشلا تلمامه لرى قطعياً لازم كله جكدرد. اوياشه
 قدر چوجقلرمزه عجبانه اوكرته بيله جكز؟
 بر چوق ارباب تجربه نك حكملرينه كوره
 چوجق انجق سكر ياشنى اتمام ايتد كدن صكره
 ميني ميني برشا كرد اولق استعدادى اتمام
 ايد بيله جكدرد. يا اوياشه قدر فاميليامن نزدنده
 حفظ اولنه جق چوجقلره نه لر اوكرته بيلورز؟
 شو سوزلرمن ايچنده هنوز درت بچق
 ياشنده كى چوجغه نه لر اوكرته بيله جكمز سؤالى
 احتمال كه نظر استغرابكزى جلب ايتشدرد .
 واقعا بر چوجق آنادن طوغد قدن صـ وكره
 ايكي ياشنى اتمام ايتمكسزىن حواس باطنه سى
 شويله طور سون خواص خمس ظاهره سى بيله

بحق کسب قوتله تکمل و تتم ایدہ میہ جکی
 پک چوق تجارب مادیہ ایله نابت اولمش ایسہ دہ
 شو مدت ظرفندہ بیله چوجقلر پداغوژی
 احکامی داخلندہ تربیہ ایدیلورلر ایسہ او یله
 بر صـورتده حاضر لنمش اولورلر کہ او چنجی
 یاشی ایچندہ بر چوق شیلر او کر نہ بیله جکلری
 کبی دردنجی یاشی ایچندہ او کر نہ جکلری شیلر
 جدیتلرینی دخی ایچہ آرتدیرمش اولورلر .
 بختمز درت بحق یاشنده کی بر چوجغه مخصوص
 ومنحصر قالسونده او یاشنده کی بر چوجغک
 نهلر او کر نہ بیله جکلنی شو یله جه سطحیاً اولسون
 بر دوشـونہلم . هم بزم تعلیم ایتـمـکـلـمـز ایله
 دکل اصل کندی سعی وغیرتنک ثمرہ سـیـلـه
 درت بحق یاشنده کی بر چوجغک نهلر او کر نہ
 بیلمکده بولندیغنی نظر حکمتده بر اجمال ایدہلم :



درد بچق یاشنه قدر برچوجق اولابر
 لسان اوکرنیور . منز چوجقلرك لسان
 اوکرنشیرینی کندیلرینک برسی مخصوصلری
 نمره سی اولدیغنه قانع اولمق ایسته میانلر
 دنمسکز؟ چوجق لسانی کندیسی اوکرنمیوب
 لسانی انره اطرافلرنده بولنانلرك اوکرتد.
 کلری حقنده کی فکره می تابمسکز؟ واقعا
 اهای! تدقیقندن بر قسمی دخی بوفکرده درلر.
 مدعالرینی اثبات دخی ایدرلر . بر چوجق
 یالکز قالسه هیچ بر لسان اوکرنه میوب عادتاً
 دیلسز قاله جغفی و دیلسزلرك ذاتاً صاغر
 اولملرندن طولایی کندیلریننه تعالیم اولنان
 تکلمی ایشتمدکلری سببیله لسان اوکرنه
 مدکلرینی در میان ایدرلر . هله بوبابده بر نمونه
 کوسترلرکه حقیقه شایان حیرتدر . اونمونه

فرانسه ده بر اورمانده بولنش اولان بروحشی
 چوجقدر . بوچوجق نصلسه پك كوچك
 ياشنده ايكن فاملياسی نزدن غيوبت ايدرك
 بر اورمانده كندی كندیسنه بيومش . همده
 حال وحشت ايچنده بيومش . يپراقلردن
 اوتلردن كوكلردن ييوب قايناقلردن درملردن
 ايچر ايمش . چيرچيلاق كزوب قيشيك شدتلی
 صوغوقلرينه قارشو دخی كندیسنی طوپراق
 ايچنه كومر ايمش . جوار كويليلره تصادف
 ايتدجه كمال توحشه قاچار كيدر كويليلر
 ايسه بو وحشی چوجقدر بشریت فوقنده بر
 خاصیت توهم ايدرك ايليشك ايتزلر ايمش .
 نهايت بوچوجفك موجودیتی خبر آلنه رق
 صورت منتظمده برصیدرتیبيله اله كچورلمش .
 هيچ برلسان ايله متكلم اولماقدن فضله يالكز

طوغریبدن طوغری به محتاج اولدینی شیلردن
 بشقه اشیا حقنده دخی هیج برفکر پییدا
 ایتماش . بوچوچنی مدنیلشدیرمک امرنده
 مساعینک کافه سی نمره سز قالمش . بونلر
 طوغریدرلر . فقط لسانی کندی اطرافلرنده
 بولنانلرک اوکرتدکاری حقنده کی سوزکزی
 جزوئجه تعدیل ایده جکر . دیگر برچوق
 ارباب تدقیق چوچقلرک لسانی کندی اطرا-
 فلرنده بولنانلردن کندی دقت مخصوصه لری
 نمره سی اوله رق اوکرتدکارینی اثبات ایدیورلر .
 دیورلرکه : چوچق هرکسک دیدکارینه
 دقت ایده ایده اشیانک اسامیه نی اولا اوکر-
 نوردده صوکره آنی مقتدر اولدینی قدر
 سوبله مکه باشلار . هنوز سوبله یه میان چوچق
 بردرجه یه کلورکه یاننده « صو » دنیاسه

شیشه و « لامپا » دنیسه لامپاه باقار .
 سویله ن بر چوق اسملرك مسمانی بیلور
 و کوسترده بونلرك اسملرینی دها صوکره
 سویله مکه مقتدر اولور . . سمنسر دیورکه :
 چو چوق بر زمانه کلدکن صوکره ثمره دقت
 وتبعی اولان شیلری یالکز کندی او کر نمکله
 اکتفا ایتیموب بشقه لرینه او کر تمک درجه لرینه
 قدر تزید غیرت ایلر . برعجیب سس ایشید .
 لسه بیوکلرك یوزینه باقوب ایله دخی سس
 کلن طرفی کوستره راء چهره سیله طور یله
 اوسسه دقت ایدلمه سنی توصیه ایله ملک نوعندن
 حالار هنوز سوز سویله یه میان چو چقلرده
 کورولدیکی کی تکلمه اقتداردن صوکره
 یکیدن هر نه بی کوروب او کر نسسه بر طور
 مظفرانه ایله قوشه قوشه کلوب آنی بیوکلره

دخی کو ستر و او کرتور . ایکنجی یاشنده
 بولن ان چو جق تعلیم ایچون موقع خطابده
 مخاطب اوله بیلیمک استعدادینی حائز اولق
 سویله طورسون اندن صوکره بر قاج سنه یه
 قدر بواسطه استعداد کن دیسنه تمامیله کلیه جکدره .
 بناءً علیه چو جق هر نه بی او کر نه جک اولسه
 اکا کندی کن دینه مجلوب و منجذب اوله رق
 انی کندی دقت مخصوصه سیله او کر نه جکدره .
 انان طور غمه صاغرک دیلسز قالمه سی ده بوقاعده پی
 اخلال ایده میور . سویله نن سسوزلره دقت
 ایده جک واسطه مالک اوله مادینی ایچون
 دیلسز قالمش اولیور .

برخانه ده یکی تکلم استعداد لرینی کو سترن
 چو جق لرک احوالنه متبعانه بر دقت ایله دقت
 ایدکز . اطرافنده بولن ان قادی نلر « ماما »

و « بووا » و « جیجی » و « قاقا » کی تصوات
 طفلانه دن باشلا بهرق چو جفك ذهننی بوزمغه
 از غیرت ایتمدکاری حالدہ بیلہ چو جق بونلرہ
 بالنسبہ پك آزمان الدانہ بیلیور . اودر سملری
 آزوقت صـ و کرہ کندیسـ بکنہ میوب ترک
 ایدیورده بعض اشیاہ کندی کندیسنه آدلر
 قویور . او کندی قویدینی اسملری تکرار
 ایدہ ایدہ یانندہ بولان بیوکارہ دخی او کرتیور .
 مثلاً آراروت محابیدسنگ اسمنی « پوپو » قوپہرق
 بو اسمی تکرار ایله آغلامغه باشلا نیجہ واو
 محابی یی ویردکاری زمان خشنود قالنجہ
 اطرافندہ بولنـ انلر محلبینک آدی . « پوپو »
 اولدینغی او کرنیورلر . لیکن بودخی بالنسبہ
 پك آزمان دوام ایدیور . اشیاک کندی
 اسملرینی او کرنوب وـ وکـ یاریم یامالاق

اولسون سویله مکده ینه تأخر ایتیمور. هله
تکلمه براز قدرت کسب ایتدکن صوکره
هرشیک آدینی نه بیوک غیرت متجسسانه
ایله صوریور ا براز دها ایلروله دیکی زمان
اوشیلری کیم یاپدینی درجه لرینه قدر استنطاقی
آرتدیره رق بویولده کی تعجیز اتدن یاننده کیلرک
جانی صیقیلوب اومینی مینی متجسسینی منعه، دفعه
قدردده وار ییور لر. هیات! اوینه ملزم اولمیور.
ینه صوریور. حتی بو ائنا لرده بعضاً یا کلش
سویله دیکی شینه بیوکلر کولوب استهزا ایتدکجه
چو جق او خطا لری تصحیحه بذل مقدور
ایله یور.

لسانی چو جقلرک کندی دقت مخصوصه لر یله
او کرندکارینک اک بیوک برهان مادسی ایکی
لسانی بردن او کرنن چو جقلرک حایدر،

بوحال حقیقه عجب ایب مهمه دندر . همده
 اوروپا متتبع ومدققلرینک هنوز نظردقتلرینی
 جلبل اتمهین حقایقندندر . اوروپاده هرملت
 یالکیز کندی لسانی ایله متکلم اولوب اجنبی
 برلسان اوکرنلر بالاخره انی تعلیم صورتنده
 اوکره نورلرده پداغوقلر برچوچق ایکی لسانی
 بردن اوکر نمکده اولدیغنه تصادف ایتزلر .
 بونوع چوچقلرده کی اک مهم حال اوکرندکلری
 لسانلر بری برندن بشقه ایکی لسان اولدیغنی
 بیله فرق ایتملری و برینی دیکرینه قائمقسزین
 اوکرنوب سسویله مه لریدر . بوعجیبه بش
 چوچقده کندی کوزلرمن اوکنده وقوعه
 ککشددر . عثمانلیجه ایله رومجه یی مادرزادلسان
 اوله رق برلکده اوکر نمشلددر . ایکی لسانی
 بربرینه قائم امق ایچون مدار تفریق یالکیز

اطرافنده بولنانلرك بر قسمی روجه و دیگر
 قسمی عثمانلیجه متکلم اولملرندن عبارتدره
 کندیلرینه روجه سویله ینلره روجه جواب
 ویرمه و عثمانلیجه ایچون دخی بویله یایمغه
 طبعاً مجبوریتلری کندیلر طرفندن دخی
 روملره روجه و عثمانلیلره عثمانلیجه سویله مک
 مجبوریتنی ایقاع ایدی ویرمشدر ،

درت یچق یاشنده کی برچو جق بووجهله
 ایکی لسان اوکرنمک کی بر قابلیت عجیبه
 کوسستمکه دخی قالماز . دیگر بعض آثار
 عاجزانه مزده بر تفصیل بیان ایتدیکمز وجهله
 بک اوغلنده ارمنی فامیلیالرینسک چو جقلری
 میاننده ارمنیجه و عثمانلیجه و روجه یی برابرجه
 اوکرنلر ده زیاده جالب نظر حیرت اولق
 لازم کلور . لکن بزجه چو جقلرینسک لسان

او کر نملری قدر مهم بر شی دخی معیشت
 ماده جه کندیلرینه لازم اولان خصوصاتی
 او کر نملر بدر. یالکیز معیشت ماده و طبیعه جه
 دکل ، حتی معیشت مدنیه جه لازم کلن شیاری
 بیله . دوت بچق یاشنده کی بر چو جق از جمله
 مینی مینی بر موسقی اولور . ایشتمدیکی شر قیلرک
 هپسینی دکل ایسه ده کندی طبعنه خوش
 کلنلرینی کندینه مخصوص بردهارت طفلانه
 ایله اوقور . سوت والد لرندن و یا خود
 دیگر قوجه قاریلردن دیکله دیکی طاوشان
 وتیلکی حکایه لرینی ده حفظ ایدوب پدرینه
 نقل ایله . عام اشیا نك مقدماتندن ده کرکی
 کی خبردار اولور . آتشدن احتراز ، بو جکلردن
 خوف ، پارلاق رنکلی چیچکلره میل وینه
 پارلاق رنکلی وقوقولی میوه لره رغبت ایدر .

دیمك كه بو كی شیلرك ماهیتنی هپ او کر نمشدر .
 کینوب قوشانوب سوسلنمکی سور . حتی
 بو خصوصده حسد و رقابت کی امراض
 نفسانیه بیه دو چاردر . تحسین و آفرینلر
 ایله آلقشدن خوشلانور . تند چهره ایله دیک
 صدا ایله تکدیر و تویخدن صومورتور . یوز
 بولدینی سودیکی آدملره او قدر دیلار دو کر که
 انسان شاشار . اومینی مینی مخلوقده خدعه .
 کارلق یالانچیلق مداهنه استعدادلری بیله
 کندیلرینی کوسترمکده تأخر ایتمز . سزی
 الدائمق ایچون او یله مداهنه لر ریالر حتی یالانلر
 طولانلر ترتیب ایدر که حیرتده قالورسکز .
 لطفکزه نائلیت ایچون ایتدیکی یالان اقلقلره
 طیان مازسکز . بونلرک هپسنی ده هپ اطرافنده
 ولسان بیوکلرک حال و حرکتلرینه دقت

ایده ایده او کر نور . بوتبعك نتیجه سی اولمیدر که
افلاطون بیوکار یاننده یاییله میه جق شیرلی اصل
کوچوکار یاننده یایمامه لی دیمش .



چوق شی او کر نه بیلور افندم ، درت بچق
باشنده کی چوجق چوق شی او کر نه بیلور .
هم اك بيوك غرابت شونده که اکا طوغریدن
طوغری یه کیمسه بر شی او کر تم دیکی حالد
او کندی کن دیسنه چوق شی او کر نه بیلور .
یا اکا صورت مخصوصه ده تعلیم ایدیله جک
یعنی تعبیر صحیح ایله انك نظر تجسسی او کر-
نیه جک شیرله طوغری ده منتظم ده-
قولای بر یولده استجلاب اولنه جق اولسه
دها نه لر او کر نمز ؟

چوجق قارک بویولده او کر نه جکاری شیر

مطلقاً درونلرنده یشادقلری محللره کوره
اولمق ضروریدر . مثلاً بر قایقچی و بالقچی
عائله سنک جوجنی شوبله درت بچق یاشنده
اولدینی حالده قانجه ، کوره راک ، اسقارموز ،
یلکن ، ایپ ، اولطه ، زوقا ، ایکنه ، آغ
فلان فسته کز ایله او قدر انسیت پیدا
ایدر که بر رسامک جوجنی بو اشیا
ایچنه صوقسه کز شو یکی کیردیکی عالمک
یبانجیسی اولدینی اوضاع و اطوار متحیرانه
سیله سزه کوسترر . قایقچی و بالقجینک جوجنی
دخی بورسامک عملیاتخانه سنه صوقسه کز
اوراده کوره جکی سه پالر ، لوحه لر ، فورچه لر ،
بویالر ، مودلار ، مانکنلر و بونلره عائده اشیا
آره سنده کندیسنی غائب ایدر . بومسه مثله یی
نظار حکمتده کوزلجه حفظ ایتلیدر . زیرا

بجشمزك ايلرولرنده بو حقيقتنه احتياج كوريله.
 جكدري . ذاتاً بجشمزك بوندن اولنده دخی
 بو حقيقتنه احتياج كوستره جك بر فقره كچمشدري.
 چوجقلىرى هريره صـوقه رق تعليم ايتـمـك
 اصـول جديده سى فقره سى كه كنديلرينه
 هر شيشى كوستره كوستره او كرتـمـك اصولـك
 طبع بشره بك موافق وملايم اولديغى ايشته
 بوضورتلرله اثبات اولتمقدري .

« يا اوقـومق يازمق ؟ » مى ديديكز ؟
 خير ! بوياشـده كى چوجق سـنـيله متناسب
 كورونميه جـك قدر شـيـلـرى او كرنه بيلديكى
 حالده اوقومق يازمق او كرنه من . او كرنه ميهـ.
 جكى تجربه اولنديغى ايچوندر كه يكي پداغوقلر
 يعنى تربيه اطفال اربابى چوجقلىرى درت
 بچق ياشـنده اوقوتـمـغه يازديرمغه باشـلامـق

غیرتنک قطعاً عاينده درلر . بومسئله ده رأیلر
مختلف ایسه ده چوجقلر الی یاشنی اکمال
ایتمیجه حروف اوزرینه نظر دقتلرینی دعوت
وجلب ایتمک خصوصنده اتحاد آراواردر .
سپنسر ایسه « تربیه مادیه وذهنیه و اخلاقیه »
سرنامه سی التنده جمع اولنان مقالات اربعه .
سنک دردنجیسنده مراجعت ایله دیکی اطباء
حاذقنک خلاصه آراسی اولق اوزره سکر
یاشندن اول چوجقلری اوقویوب یازدیرمغه
باشلاماق رأینده در .

واقعا بعض کیمسه لر حروف هجا
شکلنده شکرلر ، قورابه لر فلانلر یاپدیره رق
چوجق بونلرک هانکی حرف اولدیغنی بیلور
ایسه آنی کندیسنه ویروب یدیرمک صورتنه
قدر درلو عجیبه لر تخیل ایتمش لر ایسه ده

هیچ بریسنک فائده سی کورولما مشدور. مکافاة
 اولسون و قتلی وقتسز بویله شیلری چوجقلره
 یدیرمک یولندمدکی اوبورلغک حفظ صحتیه
 مغایرتندن قطع نظر ولوکه چوجق حروف
 هجایی اوکرنمش اولسون حروف مدک
 قوتلرینی اوکرنمینه یالکز حروف هجایی
 اوکرنمه سندن نه حاصل اولور؟ ولوکه حروف
 مدی ده اوکرنمش اولسون، قواعد املائی
 اوکرنمینه و بعض حروف زائده و قوف
 پیدا ایتیمینه لاتین حروفی استعمال ایدن
 ملتله اطفالی بیلله او قویه مایه جقلری کبی عرب
 حروف بیلله تعلیمک بو درلوسی هیچ ده ایشه
 یاراماز. زیرا بر مرتب قاصه سندن کی انواع
 حروف قدر قوراییه و شکر یاییله ماز آ؟
 طقه-وزنجی و هله یدنجی یاشندن اول

چو جقلری او قوتوب یازدیرمغه سوق ایتک
 بهوده یره یورمه-درکه بویورغوناغک صحت
 اطفال اوزرنده کی زیانی پک مهمدر . سپنسر
 شمیدیکی اولادک جسم وجشه جه بابالری درجه سنه
 واره مادقلری حقنده سالف الذکر مقالات
 اربعه-سنک ایکنجی-سنده اوزون اوزادی به
 نبعاته کیریشیور . اک بیوک اس-بایدن بریسی
 اولق اوزره اک تازه یاش-لرده چو جقلری
 یورمق مسئله-نی کوس-تریور . بویورغونلق
 برکور بوز بابانک چو جغنی چلمسز براقه جغنی
 کبی هنکام طفولیتنی بویله یورغونلقلر ایچنده
 کچیروب جیلز قالمش اولان اطفالک اولادی
 دها ضعیف قاله جغنی بدیه باتدن اولق اوزره
 انظار حکمته وضع ایله یور . ذاتا تعلیم و تدریسک
 اصول جدیده سنجه او قویوب یازمق نهایت

ایکی سنه ده حاصل اوله جق برشیدر. هم «قرائت
و کتابت» باقملم «تعایم و تربیه» کلمه لرندن
مقصود اولان معنائک هر جهتی جامع اوله -
بیلور می؟

«قرائت» نه در؟ چو جغه آ ناسنک باباسنک
ویا خود بر معلمک س-ویله یه جکی شیلری بر
کت-ابک س-ویله مه سی! دکلی؟ فقط دقت
ایتملی که چو جق کت-ابک س-ویله مه سی می دها
قولای اکلار یوقسه بر کیمسه نک س-ویله مه -
سنی می؟ کتاب حد ذاتنده بر دیلسز دفتر دره
اودیلرسزه تودیع ایدیلن س-وزلری چو جق
کندیسی سویلنه جک. اوت کتابک مندرجانی
اولان شیلری کتابه چو جق کندیسی سویله -
توب بعده کندیسی اکلایه جق! بونه بیوک
کلفتدر؟ او قودیفنی اکلایه جق هم ده ممکن مرتبه

اکلایه بیلمک قدرتی الی ، یدی یاشنده کی
 چوجقلمده دکل آ اون اون ایکی یاشلرنده کی
 چوجقلمده آرامه کز بیله بیهوده در . واقعا
 بویاشلرده کی برچوجقلمده کی کتابی صالدر
 صالدر اوقور . او کتابک محتویاتی املا ایتسه کز
 یا کله سوزار له رق یازار بیله . اما ا کلامغه کلنجه
 امید بیهوده یه ، خیال خامه دوشمه یکز . اکلایه ماز .
 شوسطر لری یازان خدمتکار امکدار کز یکر می
 بش او توز سنه در تعلیم اطفال تجار بیله اشتغال
 ایدیور . اولادینی احفادینی کاملاً کنندیسی
 اوقوتمش اولدقن فضله آنلردن خارج بر
 چوق اطفالی دها اوقوتمش و بعض وقتلر
 بعض یرلرده ایکی اوچ یوز اطفالک تعلیم
 و تربیه سیله طوغربدن طوغری یه و بحق
 اشتغال ایتشدور . « خارقه طبیعت » اطلاقنه

سزا اولان بعض نوادر ان کیادن بشقه اون،
اون بر، اون ایکی یاشلرنده کی چوجقلرک الک
آچیق عبارله لری دخی بحق اکلایه بیلدکلرینه
تصادف ایده مامشدر.

اما بو حال یالکز بزه مخصه و صدر ظن
اولماسون. بزم تکلم ایتدی کمز لسان بشقه
ویازدیغمز لسان بشقه اولدینی ایچون اطفالده
قدرت تفهم دها کج حاصل اوله جنی طبیعی
اولمقله برابر کوچلک یالکز بوندن عبارت
دکلدر. سو یلدیکمز کی یازم دیغمز دن ویازدیغمز
کی سو یله مدیکمز دن طولانی او قود یغنی اکلامق
اما بحق اکلامق امرنده بزم عثمانلی چوجقلری
اوروپالی چوجقلردن زیاده مشکلاته دوچار
اولورلر ایسه ده بو مشکلات اوروپالی چوجقلر
ایچون ده آزدکلدر. آنلر عادتاسو یلدکلری قدر

و حقى سويلدكارندن بيله دها ساده يازارلر .
 مثلا بزم « اولوب » و « اوله رق » و « اولد »
 يغندن « كېي تعبير لرمزك مقابلى اولان وجهلرلى
 اولام اولام اوزاتمقده بزمكيلر قدر تاثيرات
 سيئه كوسترن « پارتيسيب پره زان » و « پارتيسيب
 پاسه » لرى بالكليله ترك ايدرك بتون بتون ساده
 يازارلرده چوجقلىر بونى ده تفهم ايدمه مدكارندن
 هر مبحثه « تمرين » صورتنده برچوق سؤاللار
 ترتيبنه مجبور اولورلر . بوسه سؤاللار معلملر
 طرفندن صوريله جق وشا كردلر طرفندن
 سؤاللارك جوابلرى ويريله جك وجوابلرده
 اكسيكلك طبعى اوله جغندن معلملر اونقصانلرى
 اكمال ايچون تفصيلات وايضا حانه كيريشه جكلر .
 ايشته بو صورتله ينه بر محاوره ومصاحبه حاصل
 اولدى . كتبك خارجنه چيقملى .

چو جق ينه كتابده او قود يغني اكلامش
اولمدي. مقصودي معلمك آغزندن آلدی.
بو كو چلك يالكز تعليم اطفالهده مخصوص
دكلدر. بيوك طلبه نك تعليمنده ده حال بويله در.
« او كرتلك » دنيلن شي كتابك فضيلتندن
اولسه ايدی معلملره نه لزوم قالور ايدی ؟
تقريرده موفق معلملر هر ملت نزدنده مرغوب
ومعتبر درلر . « هذا العلم من افواه الرجال »
كلام حقيقت بياني بوندن طولاي سويلنمش
ونتيجه قرار « العلم في الصدور لا في السطور »
حكمنه بوندن طولاي منجر اولمشدر .



چو جق قلك احوال روحيه سيله بويولده كي
اشتغالاتي شمديلك دها ايلرويه كوتورميه لم.
اشتغالانك بودر لوسني انشاء تعالى ايلروده

پرر مبحث مستقل صورتندہ یوروتمک ایچون
 شم دیکلک بو قدری کافی کورولس-ون . فقط
 چوجقلرک قابلیت نفہملری امرندہ خیال ایله
 اوغراش-میہلم . حقیقت مادیہی آرایہلم .
 چوجقلر ہیچ اولماز ایسہ الی یاشنی اکمال
 اینزدن اول او قوتوب یازدیرماق اساسنی
 قبول ایدہلم . آندن صکرہ دخی س-کزیاشنی
 اکمال ایدنج-یہ قدر یالکز او قویوب یازمق
 او کرتوب او قودقلرینی اکلامق ودوش-وند-
 کلرینی بازی ایله اکلاتمق مسئلہ سنی مقصوددن
 خارج طوتمنی ده او اساسہ علاوہ ایدہلم وتدقیقات
 آتیہ منری ایشتہ بواساس اوزرینہ یوروتمہلم :
 ممالک سائرۃ مترقیہ ده الی یاشندن اشاغی
 چوجقلر ایچون دخی مکتبلر واردر . بونلرہ
 « نه قول ماترنل » یعنی « والدہ لک مکتبلری »

دنیلور که لیلیری ده واردر . نهاریلری ده !
 اما بونا ده قرائت و کتابت درسلری یوقدر .
 « علم اشیا » درسلری واردر . او علم اشیا
 درسلمرینک کتابلری نه در بیلور میسکیز ؟
 برچوق رسملر ، مودلار ، او یونجاقلر ! ینه بویله
 پداغوژی یه دائر بر مقاله ده دخی خبرویرمش
 اولدیفم وجهله برادرم محمد جودت مینی مینی
 کریمه سی سنیحه یه اجناس حیوانانی بر تاریخ
 طبیعی اطلسمندن او کرتدیکی زمان سنیحه اتی
 یاشنده یوق ایدی . معنوی قرن داشم ابوالضیاء
 توفیق بك مابه التکنیسی اولان و کتجه لکنه
 طویه مایان یورکلر آجیسی زواللی ضیایه مصور
 کتباب وغزته لری او یونجاق ای دینه رک هر
 کوردیکی رسمک دلالت ایتدیکی معنایری
 چو جق صالدر صالدر تعریف ایده بیلدیکی

زمان التي ياشندن پك ده زياده دكل ایدی .
لیکن اوکنده کی رسمه باقهرق مثلاً :

— شو طاوشان شوراده اوتلایور شو ز اغار
انی اوراده کوروب باشنی افندیسی اولان شو
آوجی به چویره رك باقمش . آوجی دخی ا کلا
مشده تفنیکنی طاوشانه طوغرولتمش .

طرزنده بر ترجمه وتفہیم کہ اویاشده کی
چو جقدن مأمول ایدلز . بوفقره یی یازی ایله
یازوب سکزاون یاشنده کی چوجغه او قوتسه
ایدیکز ضیانك رسمه باقهرق ا کلا دینی قدر
اوشیی چو جق او عبارتہ یی او قویہ رق ا کلا یه ماز
ایدی . سوز صرہ سی کلمش ایکن عرض و اخطار
ایده لم کہ بالاخرہ بورسم تماشاسی و بویول ایله
بروقه نك ترجمہ سی مسئلہ سی پہ داغوزی یعنی
تربیۃ اطفال امرندہ او قدر ایلر و یه کوتور لمشد ر کہ

« مندرجاتسز حکایه » نامی التندہ بعضاً بزم
 رسملی غزته لردہ دخی نمونہ لری کورلدیکی
 وجهله قوجه بر حکایہ بی اکلاتق مرتبه سنہ
 قدر وارد یرلشدر . بومندرجاتسز حکایہ لری
 کوردیکزیا ؟ بر حکایہ سویلہ نیور اما یازی ایله
 دکل، رسم ایله سویلہ نیور . فقط بالطبع
 یالکز بر رسم ایله دکل . حکایہ ده قاج حال
 متصور ایسه او قدر رسملر تصویر اولنیور .
 مثلاً ایلک رسمده براوطه و او طده بر رسامک
 سه پاسی و سه پانک اوکنده رسامک کندایسی
 همده رسم یا بمقله مشغول اولدینی صورتی
 کوریلنیور که او طه نک بر طرفنده دخی قوجه مان
 بر کدی او یوقلامقده بولنیور . بونی اکلا .
 دیکزیا ؟ ایکنجی رسم ایسه رسام حالا چالشمقده
 اولدینی حالده بر طرفدن بر فاره ظهور ایتدیکی

و كدينك اويانوب فارميه مقابل برجرأت
صیادانه ایله سوزولدیکی ارانه اولنیور. بونی ده
اکلادیکز. اوچنجی رسمده فارمك سه پایه
یاقلاشوب حتی اوزرینه ده چبقه رق رسامك
ایشله دیکی لوحه نك آرقه طرفندن چرچوبه سی
اوزرینه اوتوردینی و كدينك ایسه اکامقابل
اولان طرفه واروب فاره اوزرینه صالدير مق
وضعیتی آلدیردیغنی کوریورسکیز. بونی ده
البت اکلادیکز. دردنجی رسمده كدينك
فارم اوزرینه صالدير دینی فقط اوحمه نك
ضربيله لوحه نك بزی یرتیلوب رسامك
قارشوسنه اغزندہ بر فارم اولدینی حالدہ بر
كدينك قفاسی و اوک اباقلری ظهور ایدی
ویرنجه زواللی رسامك حیرت وقورقودن
کوزلری فال طاشی کبی آچیله رق صاحبلی

دیم دیک کس یلدیکی ارانه اولنیور . آرتق
اکلاش لملایه جق نه قالدی ؟ ا کر اوزمانلر بو
مندرجاتسز حکایه اصولی ایجاد اولنش
بولنسه ایدی ضیا بویله دوت رسمدن قوجه
بر حکایه یی اکلامقده اصلا زحمت چکمیجهک
ایدی . حالبوکه اوزمانلر ضیا الف بایی بیلله
بیلمز ایدی . برقایج دفعه حملاه ایدلمش ایسه ده
هیچ برفائده سی اوله مامش . فائده سی اوله مامق
طبیعی دکلی یا ؟ صوکره ابوالضیاء بکا :

— امان قرداش سن بلکه شونی ییلد -

یررسک . سـنک یکی اصـولجه برتجربه ایت
باقلم .

دیمسیله تجربه یه باشلادق . باشلار باشلاما ضیا
دخی صالدر صالدر او قودی یازدی . نه دن ؟ تمام
چاغنه کلمش و اوزمانه قدر کوزی او کنده کی

اشيا حقنده پدر و والدينك تلقينات نافعه سی
 سایه سنده ذهنی قوت بولمش ایدی ده آندن.
 تعلیم خصوصنده اس الیاس « بیلکی »
 در . بیلکی اولور ایسه قرائت و کتابتک
 اهمیتی ایکنیجی درجه ده بیلک عد اولنق هیچ
 ده بعید دکلدر . چونکه بیلکی اولمادقن
 صو کره قرائت و کتابتک هیچ بر فائده سی
 اوله ماز ده انک ایچون ! اسکی زمانلرده
 اوقومقدن یازمقدن عاجز یک چوق حکومت
 مأمورلری وار ایدی . متصرفلق و حتی والیک
 درجه لرنده مقامات مهمه بی بیلک اشغال ایده
 بیلورلر ایدی . بولردن بعضیلری حقیقه
 « بیوک آدم » صایله بیلک قدر آثار
 موفقیت کوستر مشلردر . فقرات لطیفه دن،
 فقط جالب نظر حکمت اوله جق فقرات

لطیفه دندر که : بر دیوان افندیسنه منس-وب
اولدینی پاشا-انک او قویوب یازمق بی-لوب
بیلمدیکنی صور مشلر . « او قومق بیلمز اما
کندیسنه او قونان شیلری بزدن ایی اکلار
یازمق دخی بیلمز اما یازیله جق شیلری پک
ط-وغری اوله رق تعریف ایدر « دیمش .
نه مهم شی ! او قومق بیلمن بر آدمه ه-ایدی
بر صحیفه بر کتاب ویر کز حاوی اولدینی شی
کندنبجه معلوم اولان اش-یادن دکل ایسه نه
اکلار ؟ هله او بیلمدیکی ماده یه دائر نه یازدیره
بیلور ؟ علومک علی الاعلاسی اولان ریاضیاتده
بیله بر مجهولی لا اقل ایکی معلومک یاردیمیه
استخراج ایدوب اکلایه بیلورز . دکلکی ؟
اولا او ایکی معلوم الله اولماقدن ص-وکره
مجهولی بولمق ، اکلامق ریاضیه-نک یاردیمیه

بیلله قابل اوله مایور . بوقاعده هر شهیده
جاریداره اولالارم کلا بیلکلی تدارک ایتدی که
صبرکه آملرک تعلق ایتدی کلی مسائله
مجهوللار دخی اولم اولرک یاریمله اولالار
بیلسونلر .

جه جقارک ایلک صاوتلریه مخصوص
اولان مکتبلرک و ایلط تدریسیه و - ن
تعلیمیسی بزم جسونلک تاریخ طبیعی
اطمینان عیارلرله اولم اولرک اولسزجه
مصور کتب و غنزلرین ، تاریخ طبیعی
یعنی موالید معنیه و نباتیه و حیوانیه عائد
لوحلردن ماعدا دیوارلر جغرافیایه ، قورمو -
غرافیایه ، هیئت ، حکمت طبیعییه ، حق
تاریخه ، تراجم احواله قدر برچوق ببحثاره
دائر لوحلرله مشغول و مستوردلر ، چو جق

بر فیلی بر زرافه یی بولو حله لرده کوروب
او کر نه جکی کبی اور شیده چیچکلر ینک، کلرک،
قرنفلرک انواعی ده بونلرده کوروب او کر نور.
آلپ و پر نه طاغری اولق اوزره رسملری
کور دیکی دائمی قارلی طاعلرک فرانسه ایله
ایتالیا و فرانسه ایله اسپانیا آره سنده بولندقلری
معام و معلمه لرندن ایشیتهرک بللر. بر محاربه
رسمی کوروب اکادائر خواجهلرک سویلدکاری
حکایه لری کمال اهمیتله دیکلر. او محاربه ده نظر
دقتی جلب ایدن بر جنرالک مناقبنی ده ا بیوک
رغبتله استماع ایلر. سوزی اوزاتما یه لم. بر
چوق شیلری بور رسملردن او کر نه جکلری کبی
انلردن او کر ندکلری شیلرک بر چوقلری
حقنه ده کی تفصیلاتی ده مودلاردن او کر نورلر.
مثلا مطبعه جیلانی ا کامتعلق بر رسمدن وانک

موجدینی ینسه دیوارده کوردیکی کو تنبرغ
 تصویرندن او کوردیکی کبی اوصافعتک ماهیتی
 دخی مودلار میاننده بولسان مینی مینی مطبعه
 ادواتندن تبیع ایلر. بویولده کی مکتبلرک اک
 منتظم لری اسویچرده واردر. چو جوق بو
 مکتبدن چیقوبده او قومغه یازمغه باشلادینی
 زمان برچوق شیلره واقف عادتامینی مینی برعالم
 اقتداریه باشلار. بو حالد کتابت و قرائت
 صنفلرنده ایلر ولدیکه کتاپ صحیفه لرنده
 کوره جکی شیلر ذاتاً کندیلری حقنده بر رفیکر
 مخصوص پیدا ایتمش اولدینی مواددن عبارت
 بولنه جقلری حسیهله او قودقلرینی ا کلامق دخی
 کندیلری ایچون کرکی کبی قولایلا شمش اولور.
 بر بالقجی خانه سنه کلن رسام چو جونی ایله
 بر رسامک خانه سنه کیدن بالقجی چو جفنگ

او زمانه قدر درونلرینه کیرمه کای بو
 خاهلرله بایجیلری و کورکلری شیلرک تهری
 اولوب قاله قیلری بیون ال یا ایمن صرمده
 بو حالک خاطرلردو حفظ و لیمه فی جانتمش
 ایلک، بوراده دخی او حال قارمرمه اخطار
 ایله دروکه : ایتمه چو سقرمه قات و کتت
 تحصیل ایتدی و مزدن اول بویله ر—ملردن
 مو دلالردن فلانلردن هر شیشی و کریمک دیمه
 چو جملری هر خایه هر عامه صوقوب اورالرد
 کوریله بیله ک شیلری نوسترمش و بللتمش
 اولاق دیمکس، ایتدادن نوبیه سینه بو بولدن
 کیریشامش اولان چوسقی آرتق نوبیه کتمش
 وهانکی عالم کیریش لایسه کندیشنی اویرک،
 او عالمک ببانجیسی بولمارکه اوراده کوردیکی اشا
 اوزرینه دوچار حیرت اولسون. هر نروده نه

کورور ایسه اولجا کورمش اولدنی شکیلرک
یاغنی یا مانندی اولدقونیا کلابرک انلری
بروقوف ایله تالق ایدر .

جانم سوزی دهاز یاده اوزاتمغه نه مجبوریت

وار؟ نوعت بشریه مزک بریسوک قسمنی حالا
« وحشی » دیه توصیف ایدیشمز سبب نه در؟

بزم کورمش ، او کورمش اولد اغمز شکیلری

انلرک هنوز کور مامش ، او کور مامش اولدقونیا

ایچین بوصفی کندیلرینه ویرمیورمی یز؟

او حالده چو حقار منی التي و طقوز یا شلرینه

و حتی اندن دهسا ایلرویه ط...وضری واقف

اولقسنزن بیوتمک بونلری عادتاحال وحشته

براقق دیمک اولمازمی؟ یالکیز کندی عالمربنه

مخصوص اولان شیلری کورمه لری ، او کورمه لری

کفایت ایتمز ، چونکه وحشیلر دخی کندی

عالمترینه مخصوص اولان شیرلی او کرندقلری
حالده مجرد انسانیته مدنیته تعلقی اولان هرشیئی
کوروب او کرشمش اولمدقلری ایچون وحشی
عد اولنیورلر.

اوت ! چوجقلری اون یاشندن صوکره
دخی علم اشیا درس لرنده دوامه مجبور اینک
لازم کله جکدر. برچوق حکم ایله برابر
سپنسر دخی بو رأیده در. بورأیه کوره
« علوم » دیمک برطاقم قواعد مجموعیه سی
دیمکدر. او قواعد اشیا عائد اولان احکامدر.
اشیای مذکوره بیلنمه دکن صکره احکامی
او کر نمکده چندان فائده کور یله میور. سپنسر
دیورکه : برکیمسه یه مثلاً برلسانی او کرتملی ده
انک احوال صرفیه و احکام نحویه و سائر سنی
صکره او کرتملی. بیلمدیکی برلسانک احکام

وقوع ادینی او کر نمکده هیچ بر معنی یوقدر
 دیور. حتی ده یوقیدر؟ بزم لسان شریف
 عربی بی صورت تحصیل مزدوش و نولسون .
 عربجه هنوز سلام و یرمه سنی بیلمدیکمز بر
 زمانده « اعلم ان ابواب التصریف خمسة
 وثلثون » و یا خود « الكلمة لفظ وضع لمعنی
 مفرد » دیه باشلا دیغمز علمارده نه قدر مشکلاته
 اوغرا بورز ؟ او مشکلات ایله برابرینه عربجه بی
 او کر نه میورز . سپنسر تا تحصیل علمک
 نهایتلرینه قدر علم اشیا درس لرینک طبیعی
 ایلروله دجه اهمیتلری آرتیق شرطیله دوامی
 لزومنی اثبات ایله یور.

*
* *

شو یوقاروده تعریف ایتدیکمز مکتبلره
 ایمر ندیکز یا ؟ بزخی پک ایمر نمشزدور . لکن

بونلرك بزدە دىخى حصە - ولارنى تىنى ايتىك
 براز كوچىر ، بو كوچىكك - بى دە واردەر ،
 شويىلە دوركە :

اورە يادە فقرا صەفى دكل آش - بهرلر
 اھالىسىدىن اورلور اولماز اورتە حاللى اعالى
 بىلە چوققىلىرىنى كىدى خانەلرندە اعائىسە
 ايدە منزلر . قادين ارکك هرکس ايجون
 چالشمق مجبورىتى واردەر . كوچوك ياشلردەكى
 چوققىلر ك محتاج ولدقلىرى باقتى بو ايش
 صاجىلرىنى ايشلارنىن منع ايدەر . درون
 خانەدە آرتق ايشە يارامايە حق براختيار پدەر ،
 عموجه ، طمايى ، خالە ، تىزە كى بركىمسە
 وار ايسە چە قىلر آنلرە تودىع اولنەرق
 ايشە جىلر ايشەلرینە كىدە بياورلر اما بويىلە
 چوقق محافىظەسەنە صالح كىمسەلرى يوق ايسە

ماده کی چو جقه لری بیله باری صبا حلری
 براقوب اقتسام لری آلمق ایچون صورت
 مخصوصه ده مؤسس ملجأ الروادر . بونلرک
 لیللری دخی بولنوب اجرت عزو لربنه
 تحمل ایله بیلنلر کیجه لری دخی چو حقلرینی
 اورالرده براقورلر . خوش اوروپاده کبار
 صنفی بیله دائمًا چو حقلرینی کندی خانه لرنده
 بیوتمزلر . کویلی سوت و الدهلر تودیع
 ایدرلر . سوتدن کسيلمش اولان چو حقلرک
 هر چاغنه کورده پانسیون لر واردر . بونلر
 اوروپاچه احتیاجات مدنیه جمله سنه کیرمشلردر .
 بزده ایسه بو احتیاج هنوز کندینی کوسترماش
 اولدیغندن بونلرکی مکتبلر یایلمش دخی
 اولسه لر جکر یاره لرینی بونلر تودیع
 شفقتلی والده لردن بیسکده بریسی رضا
 کوستره من . بزده کی والده لر هنوز چو حقلرینی

کوزلری اوکندن آیره مازلر. اويله بش التی
 یاشلرنده یاور و جقلری دکل آدها بیوکلرینی ده
 قولای قولای کوزلری اوکندن آیره مازلر.
 اکمال تحصیل ایچ-ون اوروپا مکتبلرینه
 کوندرملری لازم کلن قوجه مان دلی قانلی
 شاکرداندن برچوقلرینی محضاً والد لرك
 شفقتلری بونعمتدن محروم براقورکه بونلردن
 بریسی دخی بو محروم فقیردر. رشديه شهادتنامه.
 سنی استحصا ایتدکن صوکره اکمال تحصیل
 ایچ-ون بنی اوروپایه کوندره جکلر ایدی ده
 والدهم اوغلانی کوزلری اوکندن آیره مغه
 ارضا ایديله مدیکی ایچ-ون کوندره مدیلر.
 بوندن ط-ولایی او ییچ-اره لری هیچ اولماز
 ایسه معذور کورمه لیدر. چوجقلری کندی
 زمانلرندن بشقه بر زمانده یاشایه جقلرینی

واوزمان کندیلری رحمت حقّه واصل اولمش
 بولنه جقلرینی وچو جقلری کوزلری اوکندن
 آیرمه ماق والدلر ایچون آنجق بر خود
 کاملق اسیله جغنی تمیز درجه سنده ترقیات
 فکریه یه مظهر اولمادقلری ایچون معذور
 کورمه لیدر . یالکز شم دیلرده بعض مکاتب
 عالیّه و خصوصیه نیک لیلی قسملرینه اولادینی
 تودیع ایتمک بیوک شهرلرده بعض والدلر
 طرفندن کوزه آلدیرلغه باشلانمش ایسه ده
 بونک دخی نه قدر کوز یاشلری بهاسنه
 اوتوردیغنی نه بز صوره لم نه ده والدلر
 سویله سونلر !

بو حالده چو جقلر مزک اوقومغه باشلایه .
 جقلری یدنجی ویاخود طقوزنجی یاشه قدر
 ایلک سنین عمر نده ذکاوتلی بر معلّمک تعلیم

و تربیه سندن ایده بیله جکاری ا- تفاده بی نه یولده

حاصل ایتلی یز ۹۰

ایشته شمدیک، حالد اعل دوشونه جکمن

شی بودریه

برچو جنی نین عمر نك ایلک اوچنده

بالکلیه والد لرك آغوش تربیه لرینده تودایع

ایتمک همان هر فاسلیا ایچ-ون ضروری

ایسه ده بو آغوش شفقت اوزرینده نکی

و معلوماتلی بر بابانک کوزی دئما آچیق بولمق

لزومنی دخی اصلا خاطر دن اوزاق طومایه-

جفز . ایاروده صیره سی کلدکجه برر مبحث

مستقل صورتنده ایشک بو جهته ناز ویره-

جکمن ایضا احاط بو لزومک درجه اهمیتنی

اثبات ایده جکدر . فقط ایلک اوچ سینه دن

صکره کی ییلارده چو جقلره برچوق شیلر

او کر نه بیامک ممکنه و حق پک قولای
ایش- لودن اولدنی درجه شیمه وادیش
بام و ایسه یور و حق منی بام- تفادین
محرم رقفه هانکی منصفک انصافی قائل
اوله بیلور؟

« آدم ایاور و حق دهاپک کوچو سرا... »
ملاحظه می او یاور و حق ایچون دوستاق دکل
عادتایک بیوک دشمنلر- پداغور یی
تربیه اطفال حکمتی نقطه نظر نجوه دخی
بو تأخیر و انتظار موافق دوش- مز- برچو-
چفی « بیوسونده اویله تربیه ایلم « دیمک
برقانی « بیوسونده اویله آتیلایلم « دیمک
بکزر- چکر دندن یقین فدان ایچون ارج نه
حال صباوت کافی اولدنی کی چو حق ایچون
دخی بومقدار سنه نك کفایتی تحقق ایله دیکی

حالده آنی بر چوق سینه لر دها تاخیر ایتک
 عینیه بر فدانه بو قدر زمان غائب ایتدیرمه
 بکزر . هم زیان یالکز شو یله ساده جه
 بر تاخیردن عبارت قالسه ینه او قدر بیوک
 بر بآس کورلمیه بیلور ایدی . فداتک بیهوده
 یره حاصل ایتمش بولندینی طالارینی کاملاً
 کسوب آتمق درجه سنده کی زیانه مقابل
 چوجقده دها بشقه زیانلر متصوردرکه
 حقیقه جالب نظر اهمیت اولیور .
 چوجق متمادیا بر مرینک نظارتی التند
 بیوتلمزده بر قاج سنه تربیه سی امال اولنورسه
 بومدت امال ظرفنده بر طاقم فنا القبر آنک
 طبعه کیروب او قدر قوتلنورکه بالآخره آنلری
 سوکوب آتمق آشی زمانی کچمش اولان
 براغاجک فضله طالارینی کسوب آتمق قدرده

قولای اوله ماز . تربیه اطفال ایله اشتغال
ایتمش اولانلرک تجربه لرینه کوره چوجغه بر
شیئی ایلك اوکرتمک او قدر کوج دکدر .
فقط اولدن او کرندیکی شیئی اونو تدیروب
یرینه آنک مخالفی اوکرتمک اک کوج واک
زیاده مشکل بر کیفیتر . دها کوچوک یاشده
بعض چوجقلر زیانکارلق ، یالانچیلق ، حتی
خیر سزلق درجه لرنده سیئات مده شه یی پک
چابوق و پک قولای او کر نه بیلور لرده بالاخره
بونلری آنلره اونو تدیر مق مربیلری ایچون
مشکلات عظیمه یی موجب اولور . بر نبات
بیله علی الاستمرار انک مربیسی اولان
باغچوانک تحت نظارتنده بیور ایسه بیانیه یلکدن
بی خبر اوله رق بیوبه چکی کی بر چوجق دخی
علی الاستمرار بر مربی نظارتی التنده بیور

ایسه احوال اردیئهدن بالکلیه مصون اوله رق
بیوموسی تحت تأمینہ الشمس اولور .
بو حالده چوجقسلری الستوتوریسلره

یعنی سلسلہ لرہ نودایع ابدالم . اولدی می ؟
واقعا بولک رجوق محاذیرینه قارشو
برچوق ده منافعی واردور . بزم احوال اسلامیہ
وعثمانیہ مزدن هیچ باشی بکنماستک شامندن
اولان اولور یالی علامتک کداری لسانیله
برار اولادمزه بر چکی تربیه وافکارک
محقق اولان محاذیرنی منعم قدرتمزوار ایسه
اولار منری الستوتوریسلره نودایع ایتمک پک
اعلادور . بوسوزی دخی بر بحجه وزیرینه
سویله یوزو . دوستلر مندن ریسی بو محاذیری
خبر وریدیکمز حالده اهمیت ورمیدرک بری
ارکک وایکیسی قز اولان چوجقسلرنی بر

معلمه به ویرش ایدی ایکی اوج سناظر فنده
 چو جقلر فرانسزجه بی اعتبار صو تنده
 او کر نمشله . اما « اعتیاد » صو تنده یعنی
 لسانک احوال مخصوصه سندن بی خبر اوله رق
 او یاشلرد کی فرانسر چو جقلرینک مصون
 اوله بیله حکمری حط لردن مصونیتلری تأمین
 ایدمیه رک او کر نمشله . سیزسک توصیه
 ایتدیکی یولده او کر نمشله که آنی بالاخره اصل
 فرانسرجه درجه سینه ایصال ایچون یکدن
 او کر نمک لزومی بنه باقیدر . خوش بولزوم
 اصل فرانسر چو جقلری ایچون ده موجود دریا؟
 نه ایسه او کر نمشله ! فقط کومک برنده پشرا فندی
 چو جقلرک آغزنده « مسلمانلر بویله یاپارلر »
 و « ترکلر بویله ایدرلر » طرزنده سوزلر
 و طورلرند دخی بودیدکلری حاللری استهزا

ایدر اشمئزازلر کوروب ایشتمکه باش-لاینجه
بیچاره پدرانستیتو تریس جنابلرینه یول ویرمکه
مجبور اولدیغنی کندی اغزیله اعتراف ایتشد.
حق بوقی یا؟ اما بازارلق زمانده معلمه جنابلری
چو جقلرک تربیه اسلامیة و عثمانیه سنی اخلال
ایتمیه جکنه دائرنه قدر سوزویرر ایسه ویرسون
نه قدر تعهد ایلر ایسه ایله سون آنک آغوش
تربیه سنده عائله او جاغنه یبانه جیلق پیدا ایدم جک
چو جقلر بالا آخره یکیدن عثمانلیلاندیرلمغه محتاج
قالورلر ظن ایدرم.

مع هذا بو محذور جدا منع ایدیله بیلور ایسه
معلمه لك دیپلوماسنی دخی بحق حائز اولوق
شرطیله اطفالی بر معلمیه تسلیم ایتمکده کی
منفعت انکار اولنه ماز. معلمه لك دیپلوماسنی
بحق حائز اولان معلمیه دیدک. بوسوز مزده

اصرار ایدرز. زیرا بر چوق اسکی قوقوتلرک ،
 اسکی آقتریسلرک معلمه لک ایچون روسیه و رومانیا
 و سائریه دو کولدری کبی استانبولی دخی
 اہمال ایتدکارینه یقینمز واردر. فرانسه معارف
 نظارتی طرفندن معلمه لک دیپلوماسنی حائز
 اولمقله برابر بوندن اول خدمت ایتمش اولد .
 قلمری برلردن حسن حاللرینه دائر شہادتنامہ لری
 حائز اولان کامل معلمہ لره محاذیرک دفعی خصو .
 صندہ کی امنیتلہ اولادی تودیعہ محقق اولان
 منفعتی هیچ برصاحب تمیز انکار ایدہ من .
 چونکہ بونلر معارف ابتدائیدہ وبالخاصہ
 علم اشیادہ تدریس قوتی بحق حائزدرلر .
 بونلرک عادی مصاحبہ سی بیلہ چوجقلر ایچون
 بر مکمل عام اشیادرسی یرینہ قائم اولورہ
 لیکن ہرکس بویلہ بر معلمہ یی استخدا م ایدہ .

بیلور می ؟ توانمت قدرت مایه به متوق قدره
 بویله بر صبر و تحمل ازده بیله جک قره مایه
 بیکده به عاله توانماز ساء علیه چو حقلر
 حقندره بویولمه کی تعلیم و تربیه نك موجب
 اوله جفی منیافی بالطبع بر بشفقه بولده
 آرایه جغز به

بزم در شونجه من بزم نجر به من بوسه ده
 ینه بابانك و آنلك و ظیفه عنویه لرینه عودت
 یولی کو تربور به چو حقلرك ايلك مكنتی
 ولده لرك آغوش شفقتیدر به و زینك اصل
 ماصدق عایه ايلك اچ نه صباوت کچر کدن
 صو کر کی سینه لرك تعلیم و تربیه سی ماده سی
 اوله بیلور قونداقده بشیکده قوجاقده بر
 چو جغك محتاج اوله جفی شفقت بر شفقت

طبیعیه در که فقیر زنکین جاعل عالم هر واده
 بو شفقتی و اولاددن درایغ ایدمه مالک جبلتی ایله
 مجبولدر. بو شفقت لایک کندیلر ندرن قالقار
 ایسه واده بیله عداولنه مازلر. لکن اطفال
 ایچون ایملک مکتب عداولنه حق آغوش مادر
 یالکنز بو شفقت جبلیه ایله مزین اولان قوجاق
 اوله ماز. اوچ یاشنه قدر والدملر چو جقلرینه
 پک آز برشی او کرته بیله رک و یا خود همان
 هیچ برشی او کرته میله رک. یالکنز بر باقته دن
 عبارت بولان خدمت لرنده بیله اکا مخصوص
 اولان قواعد علمییه قوجه لرینک یا دیمله
 توفیق حرکت ایدم بیله جکلرینی بوندن اول
 بیان ایتمش ایدک. اما ایملک اوچ سنه دن صو کره کی
 وظیفه لری بو کاده مقیس دکدر. او وظیفه لری
 بحق ایضا ایدم بیله جک والدملر مملکت مزده

هنوز يك چوق دكلدرلر.

بزم اون چـ وجغمزك ايكي والدهسى
 واردركه ايكيـسى دخی ايلك اوچ سـنه
 ظرفنده چوجقلرينه باقمق ايجون لازم كلان
 وقوفده قوجهلرينك معاونتنه همانده محتاج
 چيقمدقلى حالده اوسنين صباوتدن صكرهسى
 ايجون آغوش شفقتلى چوجقلرينه مكتب
 اوله جق والدهلردن اوله مديلر . بوندن طولاي
 كنديلرينى مؤاخذه ايدم . مؤاخذه به حقم
 دخی يوقدر . ايكيـسندن ده يردن كوكه قدر
 خشـنودم . نه قادينلقلرينه هيچ ديه جكم
 اولمدينى كي چوجق باقمقلى دخی موجب
 خشنودى اولمشدر . اپكيـسنگ توليد ايله دكلرى
 اون برچوجقدن يالكـز بريـسى همده هنوز
 عجميلك زمانى عد اولنه بيله جك ايكنيجى

مولودم ضایع اولمشدر . دیگر اون دانه سیاه
 اوچ حفید وینه بزه متعلق برقاج چوجقلر
 حمد اولسون قضا سز یتشمشدردر . بونلرک
 جمله سی صحت و سلامت وجوده مالک هر
 اعضا سی درست چوجقلردر . ایشسته
 والده لرینک شو حسن خدمت لرینه مبذدرکه
 ایملک صباوت کچدکن صو کره چوجقلرینه
 آچه مادقلری آغوش شفقته بدل بن کندی
 آغوش می آچدم ، آنلرک تعلیم و تربیه سی
 خدمتی کنیم درعهده ایتدم . شمدی هر
 بری زوجه و مادر اولان ایملک صنفی صورت
 تدریس و افعا اک صولک صنفی صورت تدریس مه
 بکزه من . تجربه آرتدقجه اصول تدریس
 دخی انتظامی آرتدردی . ایوم صولک صنفی
 تشکیل ایدن طقوزر یاشنده کی ایکی اوغلان دن

اول برصنغم دها واردر که اون بچقدن اون
ایکی بچغه قدر یاشلرده ایکی کریمه ایله بر
حفیده دن لمتشکلدر .

بونلره — حکم سپنسر طارماسون —
اولدقجه قواعد صرفیه ونحویه سیله برابر
عثمانلی لسانی کرکی کی او کرته بیلم .
ینه کرکی کی عربی وفارسی دخی او کوندیلم .
بیلم کاربی لغت لک معناسی بیلدیر لک شرطیله
پک چوق عربی وفارسی عبارتیه معنا
ویزه بیلورلر . عقائد دینیله نینی پک کورل
او کوندیلم . حکمت اسلامییه نقطه نظرینه
واصل اوله رق دینلرینی پک عالی بولورلر ،
پک سورلر . بر پارچه حساب ، جزوی
هندسه کوردیلر . جغرافیاسانک عثمانیه نی
ایچه واسماو عمودیه نی دها مختصر آو کوندیلم .

سیر شریفه نبویه الك زیاده بودکاری میبحث
 اندیشی کی نارنجیدن دخی براز خبر آندیلر.
 کسیرلی ذاتاً روحیه متکلم اولدقلری حاله
 فانسز حالینه مانع اولمناقی الحیون هنوز
 روحیه وقوتوب یازدیرمادم. قریب باشلاسم.
 ذاتاً بیدکاری بوکوزل لسان دخی براز
 وقوتوب یازدیرمادیر. اما فرانسزجه لرده
 کرکی کی موفق اولدم. ایکی، یکی بحق
 سنه لک برتریس نتیجه سنده اولدقجه
 بحیث س. ویله که وهرنه سویله نور ایسه
 کلاسه و اوقاتی نفک شیلری فرانسزجه دن
 کجه یه وره ایلدیرنی ترکیجه دن فرانسزجه یه
 وجه ایدم بیلمکه قدر اقتدار قازاندیلر.
 له تود داخلندم کان تعلم ایتدیلر. قرائت
 موسیقیه لرینی ایجه ایلرولندیلر. یازلمش بر

پارچه‌ی جزوی تبع و تمشقی ایله کندی
 کندیله‌ینه چیقارمیلورلر . عثمانلی موزیقه‌منزک
 قلاسیق قسمی اولان اسکی فصللاردن دخی
 برخیلیمسنی لحن ایله مشق ایتدم . شو کونجی
 کونده یکریمی اوچ فصله منقسم ایکی یوز قدر
 کار ، بسته ، نقش سماعی ، مصنع شرقی و یوروک
 سماعی از برلمشلدور .

بوسوزلری تمدحه حمل ایتمزسکز یا ؟
 بوش یره تمدح مقصود اولسه ایدی شمدی به
 قدر صحایف مطبوعانده « احمد مدحت زاده
 هاجر » و یا خود « معلم ناجی زاده نیکار »
 امضاسیله برچوق شیلر کورمکزه نه مانع اولور
 ایدی ؟ حتی بوکی امضالره برچوق شارقیلر
 مارقیلر بیله کورمکزه ؟ مقصود قوری تفاخر
 دکل اولاد باباسی اولان اخوانمزه مثال

كوسترمك اولديني ايچون بوسوزلك جديته
 اينانمكزي رجايدرم . چـ وجقلمك شو
 درجه تعليملرني واقعا كافي كورمـ ورم .
 تحصيللرينك اكالي ايچـ ون برقاج سـ نهدها
 چالشمق لازم كله جـ كدر . اما شو ياشلرنده
 شو درجه تحصيللاريله اوروپا پانسـ يونلرنده
 تدريس ايديلان يـ نه او ياشده كي اولور اولماز
 شا كردانه بنمكيلري ترجيح ايلرم .

اصل دوشـ ونيله جـ شي چوجقلمري
 بووجهله تدريسـ نصل وقت بوله بيلديكم قضيهـ .
 سيدر . انسان وقتني اي قولا لائق يولني
 بيلدكـ دن صـ وكره وقت اميد اولـ نه مـ يه جـ
 قدر بركت پيدا ايدييور . بك چوق شـ يلره
 وقت بولـ نه بيلور . كرك مـ موريت رسـ مـ يم
 ايچـ هـ يوريجي بر مـ موريت اولديني وكرـ

کندی تېمات و اشتغالات خصوصاً — آثار
منتشر مېله دخی اکلا نېله جفی و جهله — ایجه
واسع بولنه دخی حالده چو جقلم ایله اشتغاله
ینه وقت بولم و بولیورم. حتی سوزك ك
طوغرینی ایسترمیسك؟ ای قاره اوقانك
ك طاتلی كچنی چو جقلمه کچر دیکم زمان
اولدینی جناب حقه تشکرات متدارانه ایله
اعتراف ایلم.

شاهلری خانمه عودت ایتدیکم زمان
یمك بوقته قدر بر ساعت مقصداری بروقت
واردن. زیرا بکفوزده سا کن اولق حسبله
صووك وایور کلنجه به قدریمك حقیقه ماز.
كرك خانه خلقندن كرك مسافر اوله رق
کله جات اولانلرك کافه سی کلی که یمك حقیقه
بیاسون. بوقتی نه ایله کچیره جکم؟ اسنه مک

ایلامی وقسه خاه امورینه لزومسز مداخالات
ایله ییهوده غوغا ایسه رکمی ؟ اغیر ! چو -
جقلرمی طاقه طردیلایوب انلرکده احبه سبله !
غوغا ایسه حاکت ایسه هم انلرله غوغا ایسه .
یحیی ایسه حاکت ایسه هم آنلرله صحبت ایسه .
کودوروز ایسه حاکت ایسه کلرلی صابا ام .
فرانسز ایسه حاکت ایسه اربوله وک افوله ماش
اولداری ایسه حاکت ایسه بو احبه من ماقا
فرانسز ایسه حاکت ایسه یان ایسه حاکت ایسه کیمین صابو کره
یاناق زمانه قدریار مو ملرنده بر ، بر یحق
ویش مو ملرنده ایکی یحق ، اچ ساعت
وقت وار . بونلری ده چسو جقلرمی حصر
ایسه هم . چونکه کندی فرات و تنم یاناق
ایچنده اولور . دردست هر ئت بولار شیلر
یاتاغمک یاننده کی ماصه اوزرنده بولورلر .

صبحا حلین واپور وقتنه قدر یاز موسـملرنده
 اوچ درت وقیش موسـملرنده برایکی ساعت
 زمان وار . بوزمان دخی چوجقلره مخصوصدر .
 یازه جق یازیم وار ایسه واپورده یازارم .
 بکقوزدن کوپریه قدر بش چاریک زمان
 چالشـقان بر محرر ایچون چـوق زماندر .
 بش چاریک دخی اقشام عودت ایدر ایکن ،
 ایشته سزه ایکی بحق ساعت زمان که بول بول
 اوقومغه ده یتریازمغه ده .

فقط کندی ایشـلریمی براقکز افندیم
 چوجقلره اشتغالی دوشـونه لم . بر ساعت
 اقشام موسـمنه کوره بر ایکی ساعت کیجه
 ینه موسـمنه کوره ایکی اوچ ساعت صباح که
 لاقل درت ساعت بر زمانی چوجقلـرک
 درسارینه صرف ایده بیلورم . مواسـمه

کوره آنلرک پروغراملری ده تنظیم اولنیور.
 هانکی ساعتده یاتوب قالقه جقلری ، هانکی
 ساعتده هانکی درسره چالیشه جقلری ، هانکی
 ساعتده یمک ییوب هانکی ساعتده اوینایوب
 اکلنه جـ کلری هپ معیندر . فرانسرجه
 مذا کره جـ لری اقربادن خانه نشـین بردلی
 قانلی اولوب موزیقه ایچون مذا کره جـ لری
 دخی بیوک همـشـیره لریدر . مبادیده لسان
 عثمانی ایچون برقادین مذا کره جـ لری دخی
 وار ایدی . شو مذا کره جـ لرک یاردیمی
 معلم یکانه حالده بولندیغمه کوره نیم متاعیمی
 کر کی کبی تهوین ایده جکی بدیه بدر .

انسانلرک اک مشغوللارندن بریسی بن
 اولدیغم حالده اولادیمی تعلیمه بوجهمله موفق
 اولور ایسه م نیم قدر مشغول اولمایان پدرلر

اچون بوزظیفه بی ایفایه وقت بوله مایه جنی
 قضیه سی عذر مقبول اوله مار . واقعا
 اقشاملر بی اقشامجلیغه وقف یتیم اولان
 پدرلر بومعذوریت ادعا سنده صرار ایلییه
 بیلورلر اما بوچره لر اسپرتو ایله تسممک
 نتیجه سی نه وله جفنی نظر انصافه آملقه رار
 پدرلرک چو قلمرله وقت کچ وورنده کی
 ذوقی دخی رنج به یتیم اولسالر چو -
 جقلمرله خاملر درونده ایله جکلری تعلیم
 وتدریس اقشامجلیغه ذوقی پرتو اقشا -
 مجلیغه قات قات فائق اوله جفنی پک چارق
 کوروب اعتراف ایدرلر ایدی . عیش ووش
 ایله تخریب وحوه دکل آفتاملری قهروده
 قرا تخاوده حتی احبابجه برخصوصی سلامقه
 کچ - وورمک دخی پدرلرک کیدی اولادیه

بر لکده کچ-ورده جکری اقش-امار صفا سینه
 قیاس قبول ایده من . محصول عمر لری اولان
 ج-کر پاره لرینی یال-کنز بر کوز ایله کورمه-ک
 کندیلری ایچون البته صفای قلبی موجب اولمق
 لازم کلدیکی حالدہ بونارله ای دیله جک مصا-
 حبه نک قلبده اوصفای دهانه قدر آرتدیره جنی
 کوچی تخمین اولنور ؟ آنلرک او مینی مینی
 عقلاری ، او کسکین ذکاوتلری نلره ایرر ،
 نلری اکلار که بر پدر اولادیلہ بویولده کی
 حسب حاللره کیریشوب ده صباوتک بوقابلیتلرینی
 بو استعدادلرینی کورنجه نظر حکمتی کندی
 مبدأ نشأتنه وحتی انسانیتک مبادی ظهور
 وترقیسنه طوغری آچالمق دخی محققدر .
 هیچ بریمز بشیکده کی حاملزی تخطر شو یله
 طورسون مبادی تکلم او انمزی دخی تخطر

ایده میز . قوه حافظه من بزی نهایت نهایت
 بش یا شمزده کی احوالی تخطرہ قدر ارجاع
 ایده بیلور ، بو تخطر دخی کنندی حاملزی دکل
 اطر افزده کی احوالی احاطه ایله به بیلور . بزه
 مبادی نشأتمزی اولسه اولسه آنجق اولاد منک
 مبادی نشأتی نتبع مسئله سی ارأه ایله به
 بیلور . حتی نوع بشرک مبادی نشأتی مثالنی ده
 آنجق بو تتبعدن آله بیلور ز . مدققین حکما
 بر چو جفک یتشمه سی قوجه نوعیت بشریه نک
 ادوار تکاملنی نصل آکدیردینی حقننده او قدر
 عجیب و غریب مقایسه اته کیرشمه شلردر که
 تتبی انسانه حیرت ویرر . لکن او تفصیلاته
 کیریشه جک یربوراسی دکلدر . انشاءاه
 بویولده کی تشریحاتک ده زمانی ویری کلور .
 شمیدیکی حالده انظار قارئینی شونقطه

مقایسه اوزرینه جلب ایدرزکه : انسا انلرده
 درلو مراقلر اولور. بعضلری قوزی وقوچ
 بسیلر، بعضلری ده انواع طیوردن کوکلنک
 بکندیکنی بسیلر. یا اولاد بسیه مک یونلره
 مقیسمی اولور؟ بعض کیمسه لر بر کوپکی صوستا
 ط-وردیرمغه و یا خود باستونی فلانی طاشتمغه
 آلدیررلرده بوموفقیتلر یله افتخار ایدرلر.
 بو یولده کی مراقلرک هیچ بریسنه اعتراض
 اولانه ماز. کیمسه یه برزیانی اولمایان مراقه
 حرمت ایتمه هرکس تربیهٔ مجبوردر، یالکز
 بو یولده کی موفقیتلر حقیقهٔ شایستهٔ افتخار
 اولملقه برابر اولادینی تربیه موفقیتمندن طولایی
 ایدیلرک افتخارک درجه سنی انظار اهمیته
 توصیه ایتک ایسته یورز. بر فدانه آشیلا دینی
 آشینک طوتمامه سندن متأثر و یا خود طوتمه.

سندن ممنون و مفتخر بیک کشی کورینور .
 کنیدی یتشددیرمش اولدینی فداندن میوه
 اقتطاقی اوزرینه زیاده سیله خشنود قالمایان
 کیمسه کوريله مزه . یا عجبا اولدینه آشیلادینی
 علم و عرفان آشیلرینک طوتمه سندن و میوه
 و یرمه سندن متحصل ذوق وجدانی نه درجه .
 لره وارر ؟ بر پدر ایچون بو یولده کی صفای
 روحانی هیچ بر شیشه مقیس اوله مایه جفنی
 اعتراف و تسلیمه حقیقه مجبوریت واردر .
 پدری براقکنز ، معلمی اله آلکنز . بر
 معلم کنیدی اذ کیای شا کردانه اولان
 محبتی و او محبتک روحنه و یردیکی لذتی بو
 یولده تجربه سی سبق ایتامش اولانلر قابل دکل
 ا کلایه مازلر . بر معلم ذکی و قابلیتلی شا کردینی
 آنک باباسنک سهودیکندن قات قات زیاده

سوه جكنه شبهه ايدلسون . معلمك بو محبتى
 و او محبتك بولدتى نه دندر؟ شا كردك ذهنته كير-
 ديكندن ، عادتاً او ذهنى كنديسى تشكىل ايتمكده
 بولنديغندن دكلى؟ بو حاله كوره بر پدر او لادينك
 معلمى دخى اولور ايسه مسعوديت پدرانه سى
 برقاج قات دها آرتار . چو جقلى حقند، كى
 محبت پدرانه سى برده محبت معلمانه ايله آرتهرق
 بوايكى محبتك مجموعى اولان لذت كنديسى-نى
 حقیقه تعریف قابل اوله مایه جق درجه-لرده
 مسعود و بختیار ایلر.

چشم امیدى بردها مشفق والده لر طرفنه
 چویرم . بحمداه تعالى سایه ترقی-اتوایه
 جناب پادشاهیده یکر مى یکر مى بش سینه دنبری
 اولادانك تعلم و تربیه سینه ایدیلن همه-لر
 نمره-سیله ایوم قادینلر مزیه-اننده معلوماتلی

والده لر نوادر دن دکلدر لر. هله اسه تانبول
 وازمیر و سولانیك کبی بیوک شهر لر مزده
 نسه وانک بوجه تدن ترقیسی جمله نی منتسدار
 براقه حق درجه نی بولمشدر. بناء علیه اولادینه
 شفقت صحیحه آثارینی کوسه ترمک غیرتیه
 مزین اولان والده لر کنیدی جکر پاره لر
 حقنده اصل بو تعلیم و تربیه جهتدن آثار
 شفقت کوسه ترمکی التزام بیوره حق اولور لر
 ایسه جکر پاره لرینه او یله بر لطف ایتمش
 اولور لر که عمر لرینه بش اون سنه قاتمش صاییلور لر
 زیر ابر چوق تعلیم و تربیه اطفال محقق لرینک
 خلاصه تجار بیله بر ابر کنیدی تجربه لر مزکده
 نتیجه سنده تخیلی ایله دیکمز یولده بر تعلیم و تربیه
 نک نمره سیله اوغلان اولسون قز اولسون
 اون بش یاشنده کی بر چوجغک مکتسه بات

علمیه سی او یاشدن صکره بشقه تحصیل کورمیه جک
بیله اولسه لر کنه دیلرینی ارباب معسارفدن
اوله رق کچن دیر مکه کفایت ایدم جکدر.

ای بو تعلیم و تربیه نك وسائل و وسائلی نه در؟
ایشته مقصود منك نتیجه سی بونی خبر ویرمکنر.



اولادینه کر چکدن محبتی اولان بر بابا ایله
آنانك ایلک اوچ سنه عمر لر نده چو جقلرینه باقمق
ایچون نصل بر سوق طبعینك امر و الجاسی
التندم بولندقلرینه دقت ایدم . بابا و آنا
وبالخاصه آنا چو جغك راحت و سلامتی
ایچون نه بیوک کلفتلری کوزه آدیر لر !
آجلق عذابنه دوشمیوب طوقلق سعادتی
ایچنده یاشامه سی ، یدم لك اضطرار باتنه دوچار
اولمایوب نظافت مسعودیتی ایچنده بیومه سی ،

وشدائد هواثیه معروض اولمایوب محفوظیت
 داخلنده عمر کچورمه سی و الحاصل بر راحتسز-
 لکدن طولای ای اغلا مایوب صیزلا مایوب
 مسعودیت مکمله و مخصوصه سی علامندن
 اولق اوزره دائما یوزی کولمه سی ایچ-ون
 اختیار ایتیمه چکلی فدا کارلق یوقدره
 حال بوکه بوندن اول دخی سه-وز صره سی
 کلدیکی زمان سویله دیکمز وجهله کویا صرف
 وظائف مادیه قسه-منه آیردیغمز بوباقنتی بیله
 بر بیوک و قوف و معلوماته محتاج قالدیغی
 حالد ایلک اوچ سه-ننه دن صکره کی سه-ننه لرده
 آنانک بابانک چو چقلری تربیه و تعلیم ایتملری
 او قدر بیوک بر وقوفه متوقفدرکه کندیلری
 دخی بر صورت مخصوصه ده تربیه و تعلیم
 کورماش اولان آنالرك و بابالرك اطفاله

يالكز كنديلكرندن بو يولده هيچ رخدمت
ايدمه حكرى محققات قطعيه دندر.

واقعا ايلك سنين صباوتك مروندن
صوككمكى سنه لر ظرفنده دخی پدر و مادر
كمدى جو حقلر نى نالكله اهمل ايتزلر .
كمديلرى لعالم و تربيه نعمتندن لزومى قدر
حصه مند اولماش بولسه لر دخی عقلارينك
ايره بيلديكى برتعاليم و تربيه ايله جكر پاره لر نى
ارشاده ينه چاليشورلر . فقط مساعينك
بودرلوسندن بر فائده جديده حاصل اوله بيلورمى ؟
طبك بر باقه كوره الك مهم جهتي تشكيل ايدن حفظ
صحت نقطه نظرندن چوجق بيوتكم ايچون
لازم كلن وسائلى الى قلم طوتمغه مقتدر
اولان طبيبيلر درلو كتابلره طولديره رق
چوجق صاحبلىر ينه تفهيم ايدمك اولورلر

ایسه بوتقییات دائره سنده کی باقی ایله
 کندی عقلارینک ابردیکی وجهله چوجق
 باقق آره سنده نه قدر فرق وار ایسه ایلک سنین
 صباوتک مرورندن صو کره آنالک بابالک
 یالکنز کندی بیلکیلرینه کوره چوجق تعلیم
 ایتمه لر یله برده پدا غوغلرک یعنی تربیه اطفال
 مسئله مهمه سنی اوزون اوزادی یه تتبعات
 و تجارب ایله نظر حکمتلرنده تعین ایتمش
 اولانلرک قلمه آلدقلری تعلیمات دائره سنده
 چوجق تعلیم و تربیه سی آره سنده ده عینیه
 اوفر ق واردر .

شمدی شو سوزلرمن اوزرینه بزده
 چوجق باقق و چوجق تربیه ایتمک ایچون
 ارباب قلمک نه قدر غیرت سزلک ایتدکلری
 خاطره کلامک قابل دکلر . بوتخاطر همده

تخطرات الیمہ دندر . کرک معارفندان اطباء مزدن
و کرک هیئت اطباء دن خارج ارباب معارفدن
برقاج ذات بویولده برقاج اثر یازمشلردر که بو
عنایتلرندن ط-ولای عثمانلیلق کندیلرینه
منت-داردر . لیکن بو مقص-دده کی وسعت
عظیمه نظر آ یازیلان ش-یلری کافی ودها
زیاده-سندن عثمانلیانی مس-تغنی کورمک او
عنایتکارلر نزدنده بیله تسلیم اولنه-حق
مواددن دکلدر .

ایمدی اولادینه کرچکن دوست اولان
آنالر بابالر ایچ-ون اولادحق-نده کی وظیفه
مقدسه لرینی ایفا امرنده وجودلرینه احتیاج
کوریلن وس-ائط ایش-ته کندی کندیلرینه
تعین ایت-دی . بو وس-ائط « تعالیمات » دن
یعنی پداغوژی یول-ده یازیله-حق تألیف-اتدن

عبارت در . آنالره بابالره تعلیمات که آنلر بو
 تعلیماتی مطالعه و تتبع ایله اکلادقدن بلله دکن
 صوکره چوجقلرینه تطبیقلری امرنده
 نصل طاورانہ جقلری ده نظر حکمتلرنده تعیین
 ایدرلر. چوجغک فوتی درجه تغذیسی ایله
 متناسب اولدیغی کورمکه برابر بسایه مکنده
 افراط وعدم انتظام چوجفی بالعکس صیصقه
 ایدم جکنی اکلیوب دوستلق غیرتیله دشمنک
 ایتک بلیه سندن بوسایه ده قورتلش اوله جقلری
 کی تعلیم و تربیله لی امرنده دخی ا کا کوره
 طاورانه رق چوجق معارف عالییه تحصیلنه
 باشلادیغی زمان کوره جکی مباحث مهمه نک
 مقدماتی آنلره دها حال صباوتلرنده ویره
 بیلورلر.

شود فترعا جزانه مک مسوداتی کندیلرینه

ارائه ايله ديكم بعض صاحب فكر ذوات بو
 تعليماتى انالره بابالره خطاباً يازم جغمز معلملره
 خطاباً يازمق دها مناسب اوله جغنى ومكاتب
 خصوصيه نك هر درلوسى سايه عنايت و ايه جناب
 ياد شاهيده تجربه ايدلمكده بولنديغى كى شايد
 بودرلوسنى تجربه ايچون دنى بعض حيتلى
 مدير لر ومعلملر ظهور ايدم جكنى اخطارده
 بولنشلردر. بورأى طرف عاجزانه مزدن اصلا
 رد اولنه مز. چونكه تماميله آراى صائبه دندو.
 فقط بز آنالره بابالره خطاباً يازم جغمز شيلرى
 ذاتاً اويله بر ترتيبه قويوب يازم جغز كه هانكى
 مكتب مدير ويا معلمى كنديلرني بو آنالربابالر
 مقامنه قويارلر ايسه اوكتابلر كنديلرى ايچون
 يازلمش اولمق درجه سنده بولنديغنى كورورلر.
 شمدي يه قدر اقلام عثمانيه نك بو يولده كى

تألیفات نافعہ یہ کیرشماش اولہ لرندن طولانی
 اقلام مذکورہ اربابی تعذیرہ عجیباً حق
 وارمیدر؟ باقلسہ حق اولما ملیدر. شمدی یہ قدر
 بویولده کی آثارہ لزوم کورولماش اولدیغندن
 بحثلہ صورت مدافعہ ده بیک درلو اعتراضلر
 ایراد اولنه بیلور. فقط بن ظن ایتک ایسترم که
 جمله من بویولده تعذیراته مستحققر. تربیه
 وتادیب عمومی یہ دائرشو یکر می اوتوز سنه
 ظرفنده بلکہ ایکی اوچ بیک کتاب یازلامشدر.
 بونلرک اک چوغی فنا اولمق نه قدر محتمل ایسه
 بر قسمی ده ایی اولمق او قدر محق قدر. آنجق
 «تادیب» یواننده عد ایتدیکمز شیلر سنین
 صباوت احوالی کوزه تیله رک یازلامش اولدقنری
 کی صباوتدن صکره دخی هر بری هانکی چاغه
 مخصوص اوله جفی کوزه تیله رک یازلامشدر.

نیچہ نصائح و مواعظی حاوی بر کتاب کورر۔
 سکز۔ اما بو کتاب هانکی یاشنده کی انسانلر
 ایچوندر؟ بور اسی تعیین اولنماش۔ پداغوژی
 میداننده اشبو تصنیف مباحثه دخی بعض ارباب
 همت براز غیرت کوستردش ایسه ده غیرتاری
 ممدوح و سهیلری مشکور اولمقله برابر نتیجه
 حاصله لری میداننده بولنان احتیاجه متناسب
 اولمق پک بعیددر۔ واقعا بر پداغوغ ایچون
 اک بیوک کوچلک کندی عرفانی صباوتک
 اک کوچوک یاشلری منزله سینه قدر ایندیره
 بیلیمکده در۔ مثلاً اون یاشنده کی چوجقلر ایچون
 یازدینی بر کتابی — ذکای فوق العاده اربا۔
 بندن ماعدا — علی العاده یکرمی یاشنده
 اولانلر آنجق تفهم ایده بیلورلرایسه مطلوب
 حاصل اولمش صایله ماز۔ واقعا عثمانلی لسانیه

بو یولده یازیلان آثارک مأخذلری پک بیوک
 یداغوغلر طرفندن ترتیب و تألیف ایدلمش
 اوله قلری مسلمدر. شو قدرکه اوز یاشینده
 برچوجفک اوشیلری اکلا به بیلمه سی ایچون
 سنین ابتدائیة صباوتنده لازم کلن یولده تربیه
 وتهیه ایدلمش اوله سی ابجاب ایلر. ممالک
 متمدنه و مترقیه ده اوماخذلر هانکی چوجقلر
 ایچون یازلمشلرایسه آنلر علم اشیاده وقوف
 تربیه سی داخلنده ییویوب یتشمش اوله جقلری
 فرضیه کتابلرک مندرجاتنه دیه جک بولنه ماز.
 لیکن بزم چوجقلر بو یولده تهیه و اعداد ایدلمش
 اولمادقلری ایچون کند ی باشلرینه اسناد آ یازیلان
 شیلر آنلر پک آخر کلمه در.

حکایه ایدر لرکه: سعدی شیرازی کلمستانی

پازدینی زمان او کتاب نفیسه غبطه چکنلر :

« آدم سن ده ! بش التی یاشنده کی چوجقلری
 اویالایه حق حکایه لر ا . دیه استخفافه
 قالقشمش لر . جناب سمدی جواب ویرمش که :
 « التی یاشنده کی چوجقلری اویالایه حق شیر
 اما قدر و قیمت لری انجق التمش یاشنده کی لر
 طرفندن تقدیر اولنه بیله جک شیر ! »
 جناب شیخ جـوابی طوغریدر . فقط
 بوکونی پداغوژی حکمتته کوره کلسـتانده
 التی دکل آسکز اون یاشـلرندـه کی چوجقلره
 دخی موافق کـوریلـه بیله جک هیچ برشی
 یوقدر . اوندن اون اوچ اون درت یاشلرینه
 قدر چوجقلر ایچون بعض شیر موجود
 اولوب اک چوغی اون سکزدن یکرمی یاشلرینه
 قدر اولان کنجلره و برازی ده حقیقه التمش
 یاشنده کی پیرلره لایقدر . پداغوژی نقطه نظرندن

ترتيب اولنه حق آثارك اك مشكل جهتي ايسه
هرچاغه مخصوص اولان تعليمات وتلقيناتي
تعين ايتمك وباخصوص اك كوچوك ياشلره عائد
شيلري تمام اوياشلره جسيبان سادك منزله سنه
اينديره بيلمكدر .

پداغوغلرك كندى عرفاني صباوتك اك
كوچك ياشلري منزله سنه قدر اينديره بيلمك
يك بيوك مشكلاتدن اولديغنى عرض ايله دك .
بوني تكرار و بو نقطه ده اصرار ايدرزه . فعلاً
وماده يك چوق دفعه لر تجربه ايله مشزدركه :
چو حقلره برشي اوكرتمك قالقشديغمزده او
شيء اكلايه بيلمك ايچون آندن اول ديكر بر
شيء اوكرنمش اولاق لازم كله جكني كور .
مشزدرده آندن اول اوكرتمك لازم كلن او
شيء تعليمه كيرشديكمزده آندن دخي دها اول

دیگر بعض شیلری او کر نمش اولم اینجه آنی ده
 او کر نه میه جکنی اکلا مشزدر . چو جفه او -
 کر تیهل جک بیلک لارک تصنیفنده کی بو مشکلات
 عظیمه دکلمدر که یوز لرجه سینه لردن بری هر
 مملکت مترقیه ده یوز لرجه پداغوغلر طولاب
 طولیلری کتابلر یازدقلری حالدده هنوز بر
 تصنیف قطعی به واصل اوله مادقلری ایچون
 حالا بو ایش ایله اشتغال ایدیورلر . سپنسرک
 انکلاترده تعلیم و تربیه اطفال اصولی علیهنده
 نه شدتلی انتقاداته کیرشدیکنی کورسه کز
 انکلاترده هنوز تربیه اطفاله دائر هیچ رشی
 یوق و یا خود نه وار ایسه هپسی مضر اولدیغنی
 ظن ایلر سکنر . ایشته حالا بو ایش ایله مدققلر
 اشتغال ایتدکاری کی مستقبل ادخی اشتغال
 ایدم کیده جکلرینه شبهه کز اولماسون .

نصل شبهه ایدیله بیلور که پداغوژی حقنده
 اجرای تدقیق و تتبع ایچون یالکیز عالم اولوق کافی
 دکلدور. ژان ژاق روسو دخی عالم و حکیم ایدی.
 اما بر بیوک منتقدک دیمش اولدینی وجهله
 «نمیل» نامی التنده یازمش اولدینی بر تعلیم
 و تربیه کتابنک تمامی حکمنه موافق اوله رق
 بر چوجق تربیه ایدلمش اولسه اوچوجغک
 بر اعجوبه زمان اولمه سندن حقیقه خوف
 اولنه بیلور. اولادینی پیچ خانیه تودیع ایتک
 مرض عجیبندن کندی قورتارماش اولان
 بر بابا ایچون وظائف ابوت تعینی حقیقه
 مشکلا بیدندر. حکیم مشار الیه «نمیل» ده بر
 جکر پاره سی دکل کندی و همنی، خیالی
 تربیه و تعلیمه حصر قام ایتمشدر. بو یولده
 تدقیقات ایچون بر چوق چوجق باباسی و دده سی

اولی، او اولاد واحفادی تربیه و تعلیم ایله
 فعلاً اشتغال ایتمش بولنلی، هم بو اشتغال
 سطحی بر درجه ده قالمایوب مکتب معلملیکی
 درجه سنه وارملی. بوبابا، بو معلم وظیفه تعلیم
 و تربیه یی بحق ا کلامش و کندی تجارب
 مخصوصه سیله او اکلاشی اکمال و اتمام ایتمش
 بولنلی. بو اشتغالات اربابی کندی عرفانلرینی
 صباوتک اک کوچوک یاشری منزله سنه قدر
 ایندیره بیلیمک ایچون تکرار صباوت ایچنده
 یاشامغه رجوع ایتمش دیمک اوله جقلرندن صیدیلرله
 هم حال اولورلر ایسه ده او حاللرک هپسنی پیرانه
 بردقله تتبع ایدرلر. بونده کی مشکلاتی استصغار
 ایتما لیدر.

بو مشکلات مخوفه کوزمزک او کندن
 آیرلماقله برابر برچوق سنه لک محصول تجاری

اولق اوزره کندیمزده دخی بومیدان مدهشه
 کیره جک بر جرأت بولیورز . بوکاشاشمایدسکز .
 چونکه بز کندیمز دخی شاشیورز . زیرا او
 محصول تجارب کوکلزک ایستدیک کی تکمل
 ایدهبیلمک ایچون دها نه قدر تجاربه احتیاج
 اولدیغنی کوروب تسلیم ایتماک محالدر . هر
 تجربه انسانک پیش نظرنده بر طاقم یکی یکی
 زمینلر آچبور . هر زمین دخی یکیدن یکی به
 تجاربه لزوم کوستریوز . بر تسلسل که صوکی
 کلیه جک . ای بوکا بر « تسلسل باطل » دیوب
 وازمی کچملی ؟ بوکا انصاف نصل قائل اولور ؟
 جرأتمزدن تجرد ایدهمیورز . الله بولنهان
 محصولی اورتهیه قویمق ایچون کوکلزده بر
 مجبوریّت حس ایدیورز . اولادک تربیه
 وتعلیمنه آنالرك بابالرك معاونتلرنده کی اهمیتی

و بواهمیتله برابر شوو اشتغالک آنلر ایچون
 موجب اوله جفی صفا ولذتی کندیلرینه کلاته
 بیلیمش ایسه ک و بوا کلایشلری اوزرینه آنلر
 دخی بر حمیت جلیله پدرانہ و مادرانہ ایله بو
 میدان تجاربه کیرشمک غیرتی اله آلورلر ایسه
 تربیه اطفال یوزندن بحق منتظر و مأمول
 اولان سعادت مشترکک قطعیا حصولی
 تأمین ایلیه جک حقایق بولوب میدانہ چیقارمق
 نتیجه سنک پک یا قلاشه جغنی آب آشکاره
 کورمکده یز .

اله المش اولدیغمز غیرتک شو یولده بزی
 نره لره قدر کوتوره جکفی وعددکل آ اخباره
 بیله جسارت ایدمه جکمز . کندی غیرتمزده ،
 غیرتمزه مغلوبیتتمزده کندیمزی مضطر کوردیکمز
 قدر قارئلرمن دخی بواضطرارک درجه سنی

بیلوب ده بزی معذور کوره جکلرینی اومسه
 ایدک بویولده براخباری بلکه کوزه آدیله بیلور
 ایدک . لکن همانده یکیدن بر کتبخانه حک
 وجوده کتورمک و او کتبخانه محتویاتی
 ظاهرده ماده دخی تجسم ایتدیره حک مینی
 مینی بر موزه خانه حک تشکیل ایتک درجه سنه
 قدرالنزام کلفت عزم و جزمنده بولندیغمزی
 ایضاح ایدیه حک اولسقی قورقارزکه غیرتمزک
 بودرجه سنه مقابل قارئلر مزده طور تحسیندن
 زیاده بر تبسم مسـ تغربانه و بلکه ده بر خنده
 مستهزیانه کوره جکلر . آنک ایچون یاپیله حق
 شیلر حقنده دکل یاپیلوب کندیلرینه عرض
 وارانیه اولنان شیلر حقنده مروت تشویقکا .
 رانه لرینی استرحام ایله اکتفا ایلرزه شمدیلک
 او یاپیلوب کندیلرینه عرض وارانیه اولنان


شی دخی ایشته شو برنجی کتابدن عبارتدر .
 بوکا ایکنجی اولق اوزره برده « بابا اولق
 صنعتی » حاضر لاشدر .


اوت بوتشبدده اولاد صاحبزینک مروت
 تشویقکارانه لرینی استرحام ایدرز . شویورنجی
 ایشده او یله یر مروت تشویقکارانه یه احتیاج
 واردر . بواحتیاجی اعتراف ایدرز اما پدر
 ومادر لرك بزه ایده جکری مروت وعنايتلرك
 بالکلیه حسبی اولمایه جق لرینی دخی طور تواضع
 وتکریم ایله کندیلرینه عرض و اخطار
 ایلرز . یالکیز تعلیمات عاجزانه من موجب
 تعلیم و تربیه ایده جکری جکر پاره لرینک
 بزجه محقق اولان استفاده لرندن ط-ولایی
 د کل . ای ! کیم بیلور ؟ اوله بیلور که
 سویله مکه جسارت ایده میورز اما هایدی

جسارت ایدم : اوله بیلورکه چوجقلرینه
اوکرته جکلری شیلرک برچوخی هنوز کند -
یلرینک دخی اوکر نمامش اولدقلری و هر حاله
اوکر نمکه محتاج بولاندقلری مواده تعلق ایدرده
هم کندیلری اوکر نورلر، هم ده چوجقلرینه
اوکر تورلر. زیرا معلومات شتی و مواد نافع
جمله یه تعمم ایتمش نعمتلردن اولدیغنی هر کون
یزه بیک وقعه اثبات ایله یور. برکون شرکت
خیریه واپورنده دومن دنیان آلت کیلرک
باشنی سمت مطلوبه چویرمکده استعمال
اولور ادعاسنده جمله یی متفق بولمش اولور
ایسه ک تعلیماتمزلک بر قسمی چوجقلردن اول
آنالرینه بابالرینه یارایه جغنی امید ایتمکده
کندیمزی معذور بولورز. دومن دنیان
آلت واپورک باشنی دکل قیچی چویرمکه

خدمت ایله دیکنی برچوق تفصیلات ایله پک
 کوچ اکلته بيلمش ایدک. هله برکون اوغلام
 ابراهیم دونهک هورکوجنده کی حکمت خلقتی
 تعریف ایتدیکی زمان هرکس بونی عمرنده
 ایلک دفعه ایشندیکی برشی اولق اوزره کمال
 حیرتله تلای ایش ایدی. «مواد نافعیه»
 و «معلومات شتی» اما!.. انلرک برچوغنه
 چوجقلردن اول بیوکلر عرض احتیاج ایدرلر
 صانورم. . ایشک دها ایلرولری بوطنمزک
 درجه اصابتی میدانه قویه جقدر.

ختم











3 1761 06991112 1

Ahmet Mithat
Ana, baba

BJ
1639
A5